

DONBOK T. LALOO

Ka Thymmei Pyrkhath u Khasi bad ki Parom

THUP BANYNGKONG



Copyrighted material



LA THOH

BAD PYNMIH

IA KANE KA KOI

KUM

KA DAK JINGHEID

IA U

REV. BRO.

E. Ferraris

S. D. B.



DONBOK T. LALOO

REFERENCE


Not to be Lent out

Ka Thymmei Pyrkhat u Khasi bad ki Parom

THUP BANYNGKONG

THE SHILLONG CO-OPERATIVE
MAGAZINE & BOOKS
BARABAZAR, SHILLONG-793002

(Ka Hok Tynrai la tyngkai.)



La pynmih da

u NONGIARAP A. LALOO bad u MARSHAL R. SUSNGI.

Library books will give you Joy for Long
If handled carefully with clean hands.

KA JINGKDEW - SLA

| | |
|----------------------------------|-----|
| | Sla |
| SHIKYNTIEN | 3 |
| SHIKYNTIEN | |
| U Waidong na ka ĩarong | 4 |

1

| | |
|---|---|
| Ka thymmei pyrkhat u Khasi | |
| ba la pynskhem da ka niam Kristan | 7 |

2

| | |
|---|----|
| Ka ĩaptram, u 'Niangthylliew, 'Niangkhar, | |
| 'Niangpysit bad ka Taro | 37 |

3

| | |
|--|----|
| U Syiem Bseĩĩ bad u 'Seĩĩ-um duh bih | 47 |
|--|----|

SHIKYNTIEN


REFERENCE
Not to be Lent out

Ban da ia la ka jaitbynriew na ki j'ingkynthoh j'ingkreñ sniew jong kane ka juk ba mynta, KA JUK TIP-BLEI KHLEM KA TIP-BRIEW, ban lait ka mar-mlien ka beif ka bynthiew ia la ka jong ka thymmei longb'iew, ban btin lynti khyndiat, ban pynshlur shibun ha ka ban ialum ia kynshew la ki khana ki parom Khasi kibā dang sah syllai ha ki shrah-bah u Hyndai, la sngewdei keif ban pynmih madan ia 'Ka thymmei pyrkhāt u Khasi bad ki Parom.' Ka thymmei pyrkhāt u Khasi ba la thoh ha ine i lyngkdop barit ka long shi-jaw na ki umpung-umthwei ka pyrkhāt-pyrdaif u Khasi bad kine ar-tylli ki puriskam-purinam bā la bynrap lang ki long khyndiat na u 'yiap-Umiew ki khanatang u Barim.

Nga dap da ka jingsngewnguh ka bakhrāw shikatdei eh ia u Rev. Fr. G. Vanni, S.D.B., bad ia i bah George Chyne Cherrapunjee kiba la ai mynsiem bad pynshlur lem ia nga ban thoh ia ka Thymmei pyrkhāt u Khasi. Ka jingsngewnguh kaba khatduh hynrei kaba dap pura kumjuh ka long ia i Bah B. Chedrack Jyrwa, Maw'ai i'ew-rynghep. Dei ma i iba la pule bad iarap pynbeif lem ia ka Manuscript 'Ka thymmei pyrkhāt U Khasi bad Ki Parom': bad lehse khlem kine ki 'Rangbah Tip-Briew Tip-Blei kane ka kot kan ym mih pyrthei.

'KHIJRIE'

Lummawbah Upper Shillong,
SHILLONG - 793005.
24 tarik u Risaw 1975.



'SHI KYNTIEN U WAIDONG NA KA IARONG

Nga la sngewkyndeh mynsiem shisha haba nga la pule ia kane ka thup banyngkong, "Ka thymmei pyrkhath u Khasi bad ki Parom" ba la thoh da u Bah Donbok T. Laloo. La une u rangbah u long uba dang sdang ban jam, pynban ki don ki dak ki shin kiba shai bha kdar ba u long uba don jingkyrmen shibun ia ka lawei. Na ki ktien ba ngi iakren iasyllok bad na ki kam kiba u pynpaw ki long da shisha ki soh kiba ai jingkyrmen shibun eh ia ngi. Ngim lah ban shu kheiñ sting ia kaba khia thew khlem da thew ia ka ha ka pylla ioh ngi kum bishar bymdei.

Ha kawei ka sngi katba ngi dang iashongkai ha kawei ka iing iap briew ngi la iapur khana shaphang ka jingroi jong ka thoh ka tar ha ka ktien Khasi ha kine ki khyndiat snem, bad hapdeng kata ka jingiakren ka basngewtynnath bha, uwei u 'rangbah uba la shu sngap naduh basdang ka jingiakren u la ong kynsan, "Ha nga hi nga shem ba ki kot Khasi kiba la mih mynta ki long ki kot kai suda, lait noh ki kot u Babu Soso Tham bad ki kot ki sahep Missionaries." Shiphang ym don ba lait kren shuh, ynda kham katto katne uwei pat u 'rangbah uba la sngewmong bha ia kata u la kylli, "Haba phi ong kumta, katno tylli na ki kot kiba la mih hadien ki kot u Babu Soso phi la pule?" Uta u 'rangbah u la jngan tiaw bad u la shu jubah jnang da kaba ong: "Ngam pat pule ia ki hynrei nga la shu peit bad sma tang ia ka kyrteng ki nongthoh ka la pynngiah lypa." Baroh ki la ia rkhiie shaid ia ka jingbishar ba thamula uta u lok, bad ka jingiakren ka la nang bteng

haduh ba uta u lok u la shu phet iam rém na ba shong khlem pat dei ka por leit. Lada kum kane ka jingjyndon jingmut ka dang don ha ngi, ngi artatien shibun ba ngin lah ban bteng pat ia ka jingkieng kshar jong ka Mynnor, ka Mynta bad ka Lawei.

Don ruh kiba pyrkhat ba kaei kaba la thoh da ki longshwa jong ngi ka la biang nadong shadong bad kiba thoh ne kiba buddien ia ki, ki long tang ki 'leh tynneng.' Kane ka jingpyrkhat ka long kaba bakla shibun. Lada shu ieh noh tang kat kaba ki la leh khlem da iabynrap ne iabyrshem lem kata ngim shym iapher eiei na ki khlieh mawshoheit kiba shu sngewhun kat kaba long, iap uba iap im uba im kam pher. Hynrei kaba ngi ki longdien ngi im sngi mynta ka long ban iai buddien lyngba ka jing-iöh mynsiem na ka jingtrei shitom jong ki ban shakri ia la ka ri bad ka jaitbynriew. Une u 'rangbah ruh hadien ba u la ring bad pynliar mynsiem na ki matti ki longshwa u la ia ksaid ban sei madan ia kane ka thup kaba la bthei na ka jingkyndeh u klong snam jong u. Lah ruh banjer ia ka "Ka Mynta Ka Pynskhem ia ka Pyrkhat u Khasi Mynnor" kaba paka kaba nylla ha la ka jingshemphang ba maian jong u. Ki don ruh hangne hangtai ki at ki them kiba u nongthoh u la buh ba ngin iöh iapuson. Ngin nym pule ne thew ruh ia u kum u Theologiam, hynrei tang kum u nongkdew bad u nongtih tynrai ia ka jingshishar kaba don ha ka niam Khasi ia kaba la nang pynskhem shuh shuh da ka niam Kristan lyngba ki nuksa kiba u la kdew hangne, U Bah Donbok u la buddien bha ruh ia I Pahep Rabon Singh, I Phadar G. Costa, I Babu Soso Tham, I 'Rangbah Sib Charan Roy, I Babu Onderson Mawri, I Dr. H. Lyngdoh bad kiwei, kumba ki paw na ki jingsot jong u. Khatduh-khatwai u pynpaw ia la ka jong ka jingshemphang bad jingtbir kaba pher na kiwei pat ki nongthoh kiba kham

mynshwa jong u. La u long u khaw thymmai ha ki thiar ka thoh ka tar pynban ka umshitja ba ngin ioh na u kan long ka dawai kaba donbor shibun.

Nalor kane ka thup bakongsan shaphang ba ka niam Kristan ka wan ban pynskhem ia ka niam Khasi u la tynsat ruh hangne ia ki Artylli ki jingthuhkhana shaphang "U Tram bad u Syiem Bsein bad u 'sein-um bym don bih", kiba u la jer kyrteng ki Parom. Kine ruh ki don la ka jong ka jingkhia thew jong ki kum shijur ki Lyngkymeng ba la sdiem ha ki shkor ki nongshad ha lympong 'Weiking kiba pynphuh-pynphieng ia ka riam ka beit u Khasi Khara ban kham ishongkun, syiem kum u thoh basim ha ka ngab ba-bhabriew lymphuif jong ka 'thei samla.

Nga sngewburom shibun eh ia une u 'rangbah ba u la lah ban tyngkai bad kunai por haduh katne halor ka kam kyndoi jakpoh jong u haduh ba un da lah ban sei madan ia kane ka thup kum u briew ba pyrkat sngewkhia na ka bynta la ka ri bad ka jaithynriew. nga sngew ba ngi dei ban niiewkor ia kano kano ka jingshakri ia la ka ri bad ka jaithynriew la ka long ka harit ruh.

Nga dang khmih lynti shibun na u khulom ksiar jong une u 'rangbah bad ba u dang lah ruh ban dang iaib'eng sa ia kiwei pat ki thup ba u dang tyngkai ha ki thiar jong u.

Sd/- B. Chedrack Jyrwa
Khasi Department
Shillong College, Shillong.

Dated Mawlai Iewrynghep
Shillong - 793008
16 tarik, u Rymphang, 1976.

LYNNONG 1

KA THYMMEI PYRKHAT U KHASI BA LA PYNKHEM DA KA NIAM KRISTAN.

(a) BA DON TANG UWEI U BLEI.

U Khasi khlem ka thoh ka tar, khlem ki nongïathuhlypa u lah ban ri kyndong ïa ka jingshisha badon tang Uwei U Blei tang da ki jingïathuhkhana ba la shu ïathuh pateng-la-pateng naduh ki sngi ki por u Hynñiewtrep u Hynñiewskum haduh kat kine ki sngi. Ym don u Khasi uba nud ban ong ba ka niam Khasi ka ngeit badon bun ki blei lait tang uta uba ka suam Khasi nylla kam tuid shuh ha ki thied snam jong u, ne dei ki myrsiang wieh lir kiba la shah wieh-rong bad met had jabieng ha uwei pat u jaitbynriew. ïa kane ka jingugeit ka niam Khasi la don ruh ki nongthoh Khasi kiba la thoh ha ki kot ki sla jong ki ban pyñneh pynsah ïa kane ka jingshisha naduh ba la slang ban mih ka thoh ka tar ha ka jaitbynriew Khasi. Kum ka nuksa lada ngi peit ïa ka jingthoh I Bah Sib Charan Roy ha ka kot jong I "KA NIAM KI KHASI KA NIAM TIP-BLEI TIP-BRIEW" Lynnong I sla 4 ngi shem ba I pynshisha ba ka niam Khasi ka ngeit ba don tang Uwei U Blei, I ong kumne :- "Unc U Blei U dei tang Uwei hi, ym don blei tam shuh sa uwei u-ar nalar U Marwei, tang Ma U Uwei

naduh jrong haduh thian-dap da U suda bad bneng bad khyndew kulong kulong."

Ngi iöhi namarkata, ba ka niam Khasi ka ngeit ba don tang Uwei U Blei, hynrei ka long kaei kaei kaba sngewsih sngewlehraiñ hi suiñ ba don ki Khasi jong ngi khamtam kiba la kylla niam noh kiba shah shkor sngewbha khlem da nud ban ña aireng haba don kiba kynthoh ba ka niam Khasi dei ka niam habun blei lane ka niam mane ksuid. Kane ka jingkynthoh ka mih namar ba ki shem ba ka duwai phirat ne ka kñia ka khriam u Khasi u pyndonkam ña ka ktien U lane KA had teng teng KI shwa ban kynjoh ña ka kyrteng 'BLEI', kum ka nuksa ngi ju iöhsngew ba u Khasi u ju pyndonkam ña kane ka ktien 'U Blei Nongbuh Nongthaw' lane 'Ko Blei Nonghukum' lane 'Ki Blei.' Na ka daw aïu ba u Khasi u ong teng teng U teng teng KA lane KI. U Nongthoh u sngew ba um donkam ban batai shuh hynrei ban shah ña u ban sot ar dkhoh na ka jingbatai I Bah H.O. Mawrie kaba I la batai ha ka kot jong I 'KA PYRKIIAT U KIIASI' : Lynnong 2 ka sla 6 had 7.

I.

"U Blei Um don gender shuh lane ym don shuh ka jingiäkren shaphang ka jinglong kynthei ne jinglong shynrang U Blei namar U la long naduh haduh bad na baroh ha baroh bad U dap lut ña ka bneng bad ka khyndew. Na U kiei kiei baroh ki sdang, ha U ki long, bad ha U kin kut bad namarkata lada ong 'U Blei' ruh ka bit hi bad lada ong 'Ka Blei' ruh bit hi."

II.

"Ha ka pyrkhat u Khasi um shim ña ka jinglong uwei ne jinglong shibun jong U Blei, um don Number shuh na-

markata lada ong 'U Blei' ruh ka bit hi bad lada ong 'Ki Blei' ruh ka bit hi. Hangne hangtai haḃa u Khasi u ong. 'KI BLEI' kam mut ba don bun ki blei, ha u Khasi U Blei U long Uwei bad shibun namar U long na baroh ha baroh bad U dap lut ia ka bneng shajrong bad ia ka khyndew shapoh.

I Bah H.O. Mawrie, kum u stad pyrkhat, ym tang ba I pynshai ia ka jingngeit u Khasi ba don tang Uwei U Blei, hynrei I sakhi ruh ba u Khasi u khamstad-khamproh ka pyrkhat-pyrdaiñ ban ia kano kano ka jaitbynriew ha sla pyrthei kata, haba shim na ka liang ka jingshemphang jong u shaphang U Blei bad I da ai nuksa I ong, ba ki Jiw ki khot Jehovah ia U Blei, ki Muslim ki khot Allah bad ki Phareng ki khot God, ha ka ktien Khasi ka mut U ym dei KA. kata ha ki, U Blei dei u shynrang. Hangne ka pynpaw keiñ ba ka bor shemphang jong ki shaphang U Blei ka duna shibun haba ianujor bad ka jingshemphang u Khasi.

Ka jingngeit u Khasi badon tang Uwei u Blei la hikai da ka niam jong u bad ia ka niam jong u la buh la seng da u Blei hi, na kata ka daw u Khasi u lamphang da kine ki ktien shwa ban knia ban khriam :

“ Ko Blei Trai Kynrad, ko Nongbuh ko Nongai,
Ia ka Niam ka rukom hanga,
U khun Khasi u khun Khara;
Ka banyngkong ka sngi.”

(Ka niam Khasi : H. Lyngdoh, Llynong 1, Sla 2)

Ka jingngeit u Khasi ba dei u Blei Uba ai ia ka Niam ka Rukom kan ym shah lano lano ruh ia ka jingiatiplom jong u ban mane ksuid. Ngim dei ban klet ba u Khasi u

tieng ia u Ksuid bad u ieid ia u Blei, kumta u ialeh ban im sngi ban kamai ia ka hok. Ka niam jong u ka hikai kumta bad ha u Khasi ym don jingthaw uba kham pynshyrkhei ban ia uba ri thlen, ri taro, ri shwar ne u nong-aiksuid. La ju beh shnong bad khi lainuid ia kum kine, kumta ban ong ha ka niam Khasi ka mane ksuid dei tang ka jingong ki 'riew jler pathar khlem pyrkhat. Hooïd ym lah ban len ba don uwei ar hangno re u Khasi ba mane ksuid hynrei kane kam dei ban long ka hok kynti ban kynthoh ia baroh ka jaithynriew Khasi. Ki riwestad ki ong haba dait uwei u dkhiew wat kyrdem baroh shithliew. Ngi iohi namarkata, ba kito kiba kohnguh shahshkor sngewbha ia kito kiba kren kynthoh bein ia ka niam Khasi dei kito ki hym treh ban tip ia ka tynrai Khasi kumba ong I Babu Soso Tham :

“ Jingshai ngi wad sawdong pyrthei
Jingshai ka ri ngim khein eiei.”

(b) KA BOR BAD JINGLONG U BLEI.

Naduh u longshwa haduh u 'riewtymmen jong ka juk mynta, u Khasi ryngkat ka niam Khasi bakyntang jong u, u ngeit ba u Blei U dei u Mynsiem naduh kulong kumah junom bhor, U dap ia ki jaka baroh. U Blei U long U badonbortam halor kiei kiei baroh. Nalor u Blei ym don shuh u ban kham khraw ha kano kano ka liang. Na kata ka daw haba u Khasi u duwai phirat u lamphang bad nam ia u Blei da kine ki ktien :

“ Ko Blei Najrong Natbian, ko Trai, ko Kynrad, ko Nongthaw, ko Nongsei-rynieng Nongsei-rta, ko

Nongsam-bynta Nongbuh-bynta, ko Blei shihajar Nguh."

(Ka niam Khasi, ka niam Tip-Blei Tip-Briew :
Sib Charan Roy, Linnong 1, Sla 4)

Lane

" A Blei, Trai Kynrad, shihajar nguh,
Trai Nongthaw, Nongbuh, Nonghukum,
Ya ka longbriew manbriew ha ka pyrthei,
Hapoh ka bneng, halor ka khyndew."

(Ka niam Khasi : H. Lyngdoh, Linnong iv, Sla 50)

Ka paw shai tyngkreiñ na kitei ar tylli ki rukom lamphang ka duwai-phirat u Khasi ba u Khasi u ai ka nguh-dem bakhraw tam ia u Blei had u phla ba u Blei U dei Uta U Mynsiem Uba long U Trai Kynrad Uba dap lut ia ka bneng ka khyndew. Uba long U Nongthaw U Nongbuh ia kiei kiei baroh. Uba long U Nongpynlong ia kiei kiei baroh, U Nongpyniaid ia kiei kiei baroh. Nalorkata u Khasi u ngeit ba u Blei U ri U sumar U ai U pynbiang ia ka jingdonkam u bynriew dei na kata ka daw ba u duwai u phirat. Lada u Khasi um ngeit kumta, un ym da sngew-donkam ban duwai phirat lane ban pyndep ia ki jingknia jingkhriam lane kum ban shu kren lyngkut sbak ym donkam lane u Khasi un ym don niam don rukom kumba u long mynta.

Kumta ngi iohi shai kdar ba u Khasi u ngeit ba don tang Uwei u Blei bad ba Une u Blei U dei Uta U Mynsiem bakhraw tam badonbortam. Ei ei ym lah ban don khlem u Blei. Kane ka jingngeit u Khasi shaphang ia u Blei naduh hyndai hynthai ka long ka jingshisha khlem jingbakla bad ka niam **Kristan** kaba la poi sha kine ki lum

Khasi kumba 150 snem mynta, ka wan ban pynshai pynskhem ha kane ka jingtip jingsngewthuh u Khasi ia la U Kynrad ka long katkum ka jinghikai u Jisu Krist U Nongseng jong ka balang Kristan. Hood, ngin shem don bun ki kynhun Kristan ba iapher ha ki rukom pyniaid kam ne iapher ki jingngeit, pynban ngi shem ruh ha baroh ki phla hi kumjuh ha don tang Uwei u Blei bad ha U long U Mynsiem hadonbortam, Uba ri ba sumar ia kiei kiei baroh kiba don ha hneng bad ha khyndew. Ia kane ka jinghikai ka niam Kristan lah ban shem ha ka kot niam jong ki kum ka nuksa, lada ngin peit ia ka Kot Niam Bakhraw ka jingkylli No. 29 (U Ei u Blei?) Ka jubah ka long "u Blei U long U Mynsiem hajanai khlemkut, U Nongthaw bad U Trai ka hneng bad ka khyndew, na uba ka babha baroh ka mih."

Lada ngi peit pat sa ia ka Kot Tikir Lynnonng 1 bad 2 ngin shem ia kine ki ktien "Ym don u Blei, hynrei tang Uwei, u Blei U long U Mynsiem, naduh bymjukut haduh bymjukut, u Blei U long U bakhraw, Bymjukylla, U bastad, U bahok, U bakhuid, U bashisha etc.

Hato kitei ki jinghikai ka niam Kristan shaphang u Blei kim dei kiei kiei kiba u Khasi u la ju tip ju ngeit naduh ki por mynba dang lung Ka Sngi U Bnai?

Don sa kawei pat ka jinghikai jong ka niam Kristan kaba sngewphylla shisha ban tip, hynrei ka long kawei ka jingmaia bajwat ban sngewthuh. Kata ka long shaphang ka jinglong LAIWEI U BLEI, Kaba la thoh ha ka Kospel bad la batai shai ruh ha ka Kot Niam Bakhraw bad ka Kot Tikir. Kane ka jingmaia, ka jinglong u Blei kata, LAIWEI la buhrieh na ka jingshemphang jong ka jaitbynriew satlak ka pyrthei tat haduh ban da poi Uta U Syiem simpah, U Nongsaid Nongthaw ban pynshai ia ka pyrthei.

Une U Syiem simpah U pynshai bad hikai dalade hi

ba u Blei U don lai jinglong kata U Kpa, U Khun, bad U Mynsiem Bakhuid. U pynshisha ruh ba U Kpa U dei u Blei, U Khun U dei u Blei bad U Mynsiem bakhuid U dei U Mynsiem U Blei, hynrei baroh lang ki long tang UWEI U BLEI YM LAI BLEI.

Ka baphylla ia ka jaitbynriew Khasi ka long ba u Long-shwa u la don ka sap ka jingsngewthuh shaphang kane ka jingshisha had dei na kane ka daw ba u Khasi haba u nguh blei u dem ngon laisien laiwat kaba long ka pharshi ba u dei han nguh ia u Blei Laiwei ne ia ka jinglong LAI ha Uwei u Blei.

(k) "U BLEI U IEID IA KI BRIEW."

Shwa ka por ba u Hynñiewtrep-Hynñiewskum, un hiar sha kane ka pyrthei, mynba U Khyndai bad U Hynñiew ki dang ñaleit ñawan u Khasi da ka sap blei kaba don ha u. u la tip bad ithuh ia ka iktiar hym lah nujor jong U Blei kum U Nongbuh-Nongthaw, U hadonbortam ha kiei kiei baroh, hynrei ryngkat bad kane u Khasi u ithuh ruh ba u Blei U ieid ia u khun bynriew. Ynda u hynñiewtrep-hynñiewskum u la palat la ryngkang ia ka hukum u Blei, ka tieng ka smiej ka la par brip ha ki laiphew-jingthaw - Wat la katta ruh kata ka jingshisha ba u Blei U ieid ia u Bynriew kam shym la jah noh na ka mynsiem ka dohnud u Khasi Khara. Kumta wat ha kata ka por ka jingdum ñongngit ha ka por ba ka sngi kyllung, u bnai kyllung ki la leit buhrieh ñalade sha kremlamet-latang um tieng satia ban khot ban pyrta ia ka jingñiarap u Blei. KURIEI, Kyrkhu-Ri-Isynei. Kane ka jingkyrpad ka mih na ka dohnud kaba tip bad ngeit ba u Blei U ieid ia u khun bynriew wat la u la palat la ryngkang ia ka hukum U Nongthaw. La pynshisha da u Blei hi ia kane ka jingngeit-jingtip u

Khasi da kaba u la shahshkor ia ka jingud jingnam u khun bynriew, ym tang kata u la ai ruh ha u Khasi ia ka niam ka rukom ban lait na u Ksuid u Khrei. Kumta naduh u Longshwa haduh u 'riewtymmen jong ka juk mynta u Khasi kumba la hikai ka niam jong u, um ju pep ban pyn-donkam ia kine ki ktien haba u duwai u phirat ban saklu ba u Blei U ieid ia ki khun bynriew.

“ Kumba la ieid la isynei hi mame Kynrad,
Ba long ka iing ka sem u tnun u tyndai,
.....
Ieid isynei hi, Kynrad ba kin da long da man
briew keiñ.”

• • •

“ A Trai kynrad, Nongsei-rynieng Nongsei-rta
Nongthep mynsiem
Ba long da ka pang ka jhia shisha katne,
Ieid isynei hi keiñ kynrad mame.”

(Ka niam ki Khasi, ka niam Tip-Blei Tip-Briew :
Sib Charan Roy, Lynnong XI Sla 80, 81)

Lane kumba la thoh da u Dr. H. Lyngdoh ha ka niam Khasi, Lynnong iv, Sla 50, 51.

“ Haba u Khasi u duwai u kyrpad blei, u dem khoh-siew bad phai khmat shaphang shatei. Nangta u duwai syriem kumne,”

“ Ah Blei Trai kynrad, shi-hajar nguh.....
Ngam pynkhrav tang ka nguh ka dem,
Ka kynmaw ka kyndit iaphi
Hynrei, ka ieid ka isynei ka jong phi.

Nga nguh ngon, nga dem khrup,
Hapoh ki sla kjat jong phi
U dem artat ngon, laisien laiwat."

Ngi iöhi namarkata, ba ym don ba lah ban len ba ka niam Khasi ka tip ba u Blei u ieid ia u khun bynriew kumta to ngin ia peit noh sa sha ka niam Kristan.

Uwei na ki nongialap ne Apostol ba ki Kristan ki kham burom dei u Ioannis Nongthoh 'Ka Ktien u Blei.' Une u Apostol u la thoh ia kaci kaba u la iöhsngew da la ki jong ki shkor na u Jisu hi, bad ha kawei na ki shithi jong u u ong - "Bad ngi la tip bad ngi la lah ngeit ia ka jingieid kaba u Blei U don ha ngi. U Blei U long ka Jingieid, bad kat uba iaisah ha ka jingieid, u iaisah ha u Blei bad u Blei ha u." (1 Ioannis 4. 16).

Da kitei ki ktien ngi iöhi biang sa shisien ba ka niam Kristan ka pynshisha pynskhem ba u Blei U ieid ia u khun bynriew kumba la ju tip ju ngeit da ka niam Khasi. Kumta U Jisu um shym hakla ban ong, "Wat mut ba nga la wan ban pynduh pyndam noh, ia ka Aifñ ne ki nongäthuhlypa, ngam wan ban pynduh pyndam, hynrei ban pynbiang." (Mark 5. 17).

Ha ka liang ka jingieid, ka niam Khasi ym tang ba ka hikai ia ngi ba u Blei U ieid ia u khun bynriew, hynrei ka hikai ruh ban ieid ia la u parabriew khnang ban poi hok poi blei, ban iöh bam kwai ha iing u Blei ynda ngi ieh-noh ia kane ka pyrthei shong basa. Ia kane ka jingshisha u Khasi u sakhi tang da ka shi-kyntien, kata, TIP-BRIEW TIP-BLEI, kaba mut to tip to ithuh ia u briew lada phi kwah ban tip bad ithuh ia u Blei. Ka long thik kumba ong ki Kristan ban ieid ia la u para marjan kumba ialade hi, katkum ka hukum ba u Jisu U la ai ha ki.

“Nga ai ha phi ka hukum ka bathymmai, ba phin ia-
ieid markylliang, kumba Nga ieid ia phi, kumjuh ma phi
ruh to iaieid markylliang” (Ioannis 15. 54).

Kumta na kiei kiei kiba ngi la iohi bad kiba ngi la pule
mynshwa, ka shai te ba ka jaitbynriew Khasi ka dei kata
ka jaitbynriew kaba kynsaitam, ba kyntangtam, haba ngi
bishar ia ka hor shemphang jong ka shaphang u Blei.
Namarkata, ka long ka kamram jong ngi iwei-pa-iwei ban
hikai ia la ki khun ki kti, para-pyrsa lada ngi kwah ban
kyntiew kyrdan ia la ka jaitbynriew ban lait ka shah n̄iew-
beĩn n̄iew-poh. Ka niam Kristan kam shym la wan ban
hikai ia kaei kaba u Khasi um tip um nang, hynrei ka
pynskhem ia kaei kaba u la ju tip ju ngeit, naduh kulong
kumah.

(d) KA KULAR IA U KSIANG.

Na ki khanatang u Khasi ngi tip ba ha ki sngi ki por u
Hyn̄iewtrep u Hyn̄iewskum ka pyrthei ka la dum tliw na
ka daw ka pop ka sang ka lait ka let u khun bynriew. Hang-
ta la mih ka ud ka lyn̄iar na u laiphew jingthaw. U khun
bynriew u ud u pyrta ia u Blei. Kuriei Kuriei Kuriei. U Blei
U la shahshkor ia ka jingud u khun bynriew bad U kular
ha kata ka dorbar dorsha ba Un phah ia U Ksiang ban bteng
sa shisien pat ia u sohpetbneng, hynrei haduh ban da poi
kata ka por, U Syiar uba dang long u batlem u bahok u la
kular hakhmat U Blei ban long u nongkit-pop u nongbah
khala ban pyllait ia u khun bynriew na ka jynjar ka lanot
ka pop ka sang. U Blei u la mynjur ia kane ka kular u
syiar kumta la mih ka jutang hapteng u briew bad U Blei.
Naduh ki por u longshwa haduh mynta mynne U Khasi
haba u Khad Syiar u ju pynshong nongrim la ka nia ha kata
ka jutang (kaba kylla long ka hukum) ba u bat u ap ia kata

ka Kular. Dei na kane ka daw ba u nongkñia u pyndon-
kam ña kine ki ktien shwa ban pynbud ña kiwei pat ki
'tien-kñia' kata :-

" Kaba ñoh ka hukum ka KULAR na myndanglong
ka pyrthei shai ka pyrthei na kjat ka Blei."

Ka niam Khasi : H. Lyngdoh, Lyncnong I & III

Ka Kitab Niam Kheñi ki Khasi :
Rabon Singh, Lyncnong X

Ka Riti jong ka Ri Lalpew Sylem :
G. Costa, S.D.B., Lyncnong XXII

U nongkñia u kren shai ba ka don kata ka jingiateh-
kular hapdeng u briew bad U Blei bad ba kata ka jutang
kaba kylla ka hukum ba u Blei un pdiang sngewbha ña ka
jingkñia kumba la bah khala u syiar tat haduh ka jingwan
uta u Ksiang kumba la kular hi da u Blei. Dei halor kane
ka jingngeit ka Niam Khasi ba u myllung khrawnam ka ri
Khasi u Soso Tham u thoh ña kine ki ktien harum ban pyn-
neh pynsah ña kata ka jingshisha ba u la ñoh na ki jingia-
thuh pateng kaba la ju ñathuh naduh u longshwa haduh
ki 'riewtymmen ka juk jong u.

" Ban kit ka pap, ban bah ryndang,
Ban eh ka Rngiew, ban khuid ka sang,
Ha sngew ka ktien U Trai Kynrad,
Hapdeng dorbar u laipheuw mrad ;
'Haduh ba poi u syiem simpah,
Ban lait u briew uei ban shah ?'

Hasngap na kremlamet-latang,
U Rangiarkhad, U Khraw Jutang,
'Haduh ba poi ka sngi Uta,
Kam pher, U Ong ngan kit manga.'

Ngi iöhi ruh na ki jingduwai u Khasi ba hadien hadien u shem ba wat la ka jingknia jong u ka la bha la miat jylluin lymphuin ba ym don shuh ka thoh ka tar, ka kjap ka star, ka brain ka briahe ne ka kad ka puid pynban ym man poi hok poi blei satia, U Khasi u duwai da kaba pynshong nongrim sa shisien pat ha kata ka jutang ka kular da kaba u shu hun noh ha ka jingpeit jingkhmih U Blei haduh ban da poi uta u Ksiang. Kumta u duwai u phirat u ong :

“ Ko Blei.....

.....
To iai map to iai isynei
Haduh ba phin da sei hi maphi
Ia u simpah U sim karo, U kynja u myntoi
U syntai u bulot, U lyndan u kynrem
U Nongsaid U nongthew
U Nongkular U Nongbatai
Uban bah ia ka sang ia ka pap
Uban khala ia ka hok ia ka sot
Uban sneng ia u khun kur u khun kha
U khun Khasi u khun Khara
shityllup ka pyrthei, shi khrum ka bneng.”

(Ka niam Khasi : H. Lyngdoh, Linnong 1, sla 21, 22)

Ngi iöhi namarkata, ba ha ka niam Khasi la ju ngeit ju tip ba U Blei u la kular ban phah ia u Ksiang ban bteng sa shisien pat ia kata ka jingkieng ksiar jingkieng rupa, ka jingiadei hapdeng U Briew bad u Blei, kata ka jingkieng Sohpetbneng.

Haba ngi phai pat sha ka niam Kristan ngi shem ba ka niam Kristan ruh ka ngeit ba U Blei u la kular ban phah ia u Ksiang naduh ka por ba ki briew banyngkong

ki hap ha ka pop kata U Adam bad Ka Im. Nalorkata ban sakhi bad pynskhem ia kane U Blei U la phah ia ki nongiatuhlypa kiha la pynskhem ia kata ka kular. Kum ka nuksa, ha ka jingthoh U Michias. Nongiatuhlypa u la kren shai ba ia uta u Ksiang yn kha ha Bethlehem hajan Jerusalem na ka iing syiem u David. Nangta don sa U Isaias, une ruh ia uba la khein bad la niew ia u kum u Nongiatuhlypa ba kham khraw namar u la iathuhlypa ba yn kha ia u Ksiang na ka Theisotti, un shah shitom shibun bad un shah pyniap. Ia Une u Ksiang yn kyntait da ki parajait jong u, hynrei yn pdiang hun mynsiem da kiwei pat.

Ngi iohi shai kdar te namarkata, ba ka niam Kristan ka pynskhem ia ka jingngeit jong ka Niam Khasi ba U Blei U la kular ha ki longshwa jong ka jait ka kynja u Khasi ban phah ia Uta U Ksiang U ban bah khala ia ka lait ka let u khun bynriew shityllup ka pyrthei shikhrum ka bneng.

(e) U KHUN KA BLEI - U KSIANG.

Ngi la iohi mynshwa ba U Blei u la kular ha u khun Khasi ban phah ia u Ksiang ban bteng sa shisien pat ia ka jingkieng sohpethneng. Hynrei ym tang katta, ka Niam Khasi ka iathuh ruh ia ngi da ka pharshi ba uta u Ksiang dei u khun U Blei hi. Nangne kein ba ka paw shynna ba u longshwa jong ngi dei u khraw pyrkhat uba don ka sap blei ha ka pyrkhat pyrdain jong u. Dei da kane ka sap blei ba don ha u kein ba ka jingshemphang jong u ka kot haduh ban ai ia kane ka pharshi kaba ngi lah ban lyngngoh hynrei ngim lah ban len. Ia kane ka pharshi ba u Ksiang u dei u khun U Blei la kren shai bad sakhi da u nongkna Khasi haba u shat pylleng u da ong:- 'Ah ko

'lengsam' "Ko khun ka Blei", lane ha ka khad syiar u ong. 'Ko 'rang iarkhad', "Ko khun Ka Blei" Ngi iöhi namarkata, ba u nongkñia u pyndonkam ia kane ka ktien 'Khun ka Blei' ha ka jingsdang ka shat pylleng ne ka khad syiar. Ia kine ki ktien la pyndonkam naduh u nongkñia jong ka por u longshwa haduh u nongkñia jong ka juk mynta. Ia kitei ki kyntien u nongthoh um shym la thaw stad hi, hynrei la pynshisha da ki nongthoh Khasi kiba la leh shitom ban lum ia ki 'Tien Kñia' 'Tien Khriam' u Khasi. Kum ka nuksa haba shat pylleng u nongkñia Khasi u ong :-

" Ko 'lengsam ko khun ka Blei
 ko banang, ko batip, ko
 balah, ko bai. Kumba la
 buh tang hi ka Syiem
 Synshar....."

Ka Kitab Niam khelä ki Khasi :
 Rabon Singh, Lynnong XI, Sla 19.

Niam Khasi :
 H. Lyngdoh, Lynnong 1, Sla 12 & Lynnong III
 Sla 34, 35 & 36

" Ko 'Lengsam khun ka Blei,
 ko banang ko batip, ko
 balah ko bai....."

Ka Riti jong ka Ri Lalpew Syiem (pt. II) :
 G. Costa, S.D.B., Lynnong XXII, Sla 97

Haba khad syiar

Ko 'Rangiarkhad, ko khun ka Blei
 ko baiöha ka hukum ka kular, na

myndang long ka pyrthei shai
ka pyrthei na kjat ka Blei,....

Ka Niam Khasi :

H. Lyngdoh, Lynnong 1, Sla 11, 12 &
Lynnong III, Sla 41

“ Te ko 'Rang Iarkhad ko khun ka Blei
ko 'Rangkynjih, ko 'Rangphawar,
ko baiöh ka hukum ka kular, na myndang
long ka pyrthei, shai ka pyrthei,
na khmat ka Blei ktien ka Blei... ”

Ka Niam Khasi :

H. Lyngdoh, Lynnong III, Sla 42

Ka Riti Jong ka Ri Lalpew Sylem :

G. Costa, S.D.B., Lynnong XXII, Sla 100

U Khasi haba u kren u da thew bad kheiñ kyntang
katta katta ia ka ktien, na kata ka daw ngi ju iöhsngew
haduh mynta ba u Khasi u ju ong 'Ka Ktien kaba tam'.
Ngi iöhi namarkata, katno tam u longshwa jong ngi un
jyn da husiar ban ym kren khlem jingmut khamtam lei lei
haba u pyndonkam ia ki 'Tien kñia Tien khriam. Haba
ngi shim tang ia ka ktien 'Ka Blei' ngi tip ba u Khasi u
mut ia la u Nongbuh Nongthaw, U Nonghukum, U Trai
u Kynrad, U Nongbuh-bynta, U Nongsei rynieng Nong-
sei-rta Najrong Natbian. Ka ktien 'Khun' pat ka mut,
uta uba donhok ban iöh ia ka nongkynti ki kmie ki kpa
ka snam ka dur ka dar ba iasyriem bad la ka kmie u kpa
ba ka pyrthei ka ithuh ba u dei shisha u khun jong kita
kiba uta u khun u kam kmie kam kpa.

Ngi iöhi hangne namarkata, ba u Khasi haba u ong
'khun ka Blei' u da mut shisha kumta bad u Khasi um

ju mut mynno mynno ruh ban ong ba ka pylleng syiar ne
ia u syiar ba u dei shisha u/ka khun U Blei ne ka khun
Ka Blei. Hynrei dei tang ka pharshi shaphang kata ka
kular ka jutang ba uta u Ksiang ba u Blei un phah dei u
khun U Blei hi. Dei na kata ka daw, ba la bynrap ia kine
ki ktien haba duwai.

“ Haduh ban da sei hi maphi (U Blei)
Ia u simpah u sim karo, u kynja u myntoi
U syntai u Bullot, U lyndan u kynrem,
U Nongsaid U Nongthew,
U Nongkular U Nongbatai
.....bneng.

U Nongkular dei U Blei hi, bad uta ujuh U Blei un
sei hi ma u ia u Nongkular uba dei u khun jong u Blei
uba long Blei lang bad u kpa, Kumta ka jingshai ba ngut
ngut nget nget shaphang ka jinglong Laiwei U Blei ka
shat hangne ruh ba u Khasi u la don ka jingsngewthuh da
ka sap ba kyrpang kaba u Blei u la bsiap ha ka pyrkhat
pyrdaiñ jong u, Kumta ngim dei ban lyngngoh ba ka phar-
shi kaba u la ai ha ngi ka shynna ba u syiar u long tang
u Nongkit pop shipor haduh ban da wan poi uta U
Khun ka Blei.

Sa kawei pat ka ktien ba u nongkñia u pyndonkam
ha kaba shat pylleng kumba ngi la iöhi mynshwa ka long
‘Ko banang ko batip, ko balah ko baiñ’ Ngi dei ban
sngewthuh shai ia ka jingmut jong kine ki ktien; Ka
pylleng dalade hi kam lah ban long ka banang ka batip,
ka balah ka baiñ lait tang lada U Blei – Ka Blei ki hun
ki mynjur ban pynshai da ki dak ki shin ka kem ka lar,
katkum ka jingpan jong u nongshat nongkheñ. Ka shai
namarkata ba u Khasi u pynskhem ia kata ka pharshi ba

uta u Ksiang ba la kular dei U Khun U Blei namar dei tang ma U u long U banang, U batip U balah U baiiai. Une U Ksiang u dei ruh ban don ka jinglong jingman ka bor ka iktiar kum ka jong U Blei Ka Blei hi.

Nalor kitei ki pharshi ba ngi la iöhi haneng, u Khasi u dang pynskhem ruh ia kawei ka jinglong bad ka bor jong uta u Ksiang ban wan. Kata ka long ba uta u Ksiang u la don kti lang ha kata ka kular ka jutang bad dei na kata ka daw ba u Khasi u khot u nam ruh ia uta u Ksiang 'U Nongkular U Nongbatai.' Kata ka pynpaw ba uta u Ksiang u la don ryngkat bad U Blei ha ka por ba sdang kata ka kular ka jutang. Ia u Ksiang, u Khasi u ong ruh ba un long u Nongsaid Nongthew u ban bah khala ia ka hok ka sot ka pap ka sang bad une u Ksiang un long ym tang na ka bynta u Khasi, hynrei na ka bynta shityllup ka pyrthei. Ia kane ka jingshisha la sakhi da ka jingduwai u Khasi haba u la shu hun ban aiti noh ialade ha ka jingpeit U Blei kumne harum :-

“ To iai-map.....

.....

U Nongsaid U Nongthew

U Nongkular U Nongbatai

.....

.....

Shi tyllup ka pyrthei shikhrum ka bneng.

(Ka niam Khasi : H. Lyngdoh, Lyncnong 1, Sla 21, 22)

Kumta ngim lah ban len ba ka niam Khasi ka ju tip ju ngeit ba u Ksiang ba la kular da U Blei dei ia la u khun- U Khun u Blei.

Haba ngi pule ia ka ktien U Blei lane ka Bible ngi shem ba ka niam Kristan ruh ka khmih lynti ia u Ksiang

bad ka ngeit ruh ba uta U Ksiang u dei ban long u khun u Blei kumba la ju tip ju ngeit ka niam Khasi. Na ka kitab ka ktien u Blei ngi shem ia kine ki ktien : "Namar-kata, U Kynrad dalade hi un ai iaphi ka dak ka shin. Hakhmih ka 'theisotti kan pun khun bad kan kha ia u Khun shynrang, bad kin khot kyrteing Emanuel ia u, (Kaba mut u Blei lem bad ngi, Isaías. 1 : 14). Nalorkata, U Isaías u ong ruh ba ia u Messiah (kaba mut uba la pynsleh pynkyntang, kata ia u Ksiang) yn khot u Syiem ka jingsuk, u Blei badonbor, u baphylla, U nongsngeng bad kpa jong ka pyrthei ka ban wan. (Isaías 9 : 6) Nalor kane u Jisu Krist uba long U Nongseng jong ka Niam Kristan u la ong dalade hi "Ba nga long u Khun jong u Blei" (Math. 27 : 43) ban pynshisha ia ka jingiathuhlypa jong u Isaías uba la kren la slem bah shwa ban kha ia U. Ki kyntien u Isaías (9 : 6) bad ki kyntien duwai phirat U Khasi (Ka niam Khasi H. Lyngdoh lynnong 1 sla 21, 22) ki iasyriem bad lah ban ong ki iadei ha ki jingmut jong ki katta katta ba mangi kum ki longdien Khasi ngim lah khlem da lyngngoh ngaiñ, pleng haduh katne pat u Blei u ieid kyrpang ia ka jaitbynriew Khasi haduh ba u la pyn-dap ia ka jingmut jingpyrkhat jong u da ki jingshisha kiba kiwei pat ki jaitbynriew ka pyrthei kin tip. Kumta ngin ym lah ban len ba ka niam Kristan ka la wan ban pynskhem ia kaei kaba u Khasi u ju tip ju ngeit ba u Blei u la kular ban phah ia u Ksiang bad uta u Ksiang u dei u Khun u Blei hi.

(g) KI DAK KI SHIN KA JINGLONG U KSIANG.

Ngi la iohi mynshwa ba ka niam Kristan ka pyn-skhem ia ka jingtip-jingngeit u Khasi ba u Blei U Kular ban phah ia u Ksiang ban bah khala ia u khun bynriew bad

uta u Ksiang u dei u khun u Blei. Mynta ngin ia peit la ka niam Khasi ka ai ki dak ki shin lane ka pharshi ban ithuh ia uta u Ksiang uba long u khun u Blei.

U Longshwa U Barim, U Tymmen bad ki 'Riew tymmen ki iathuh pateng la pateng shaphang kata ka dorbar dorsha hyndai jong ki laiphew-jingthaw bad ki ong ba uba jah ha kata ka dorbar dei tang u syiar uba long u khun lymboit-lymbiang uba dang shida u bahok u batlem. Une u syiar u mih na ka kremlamet-latang ban leit sha kata ka dorbar ha kaba u kular ban bah khala ia ka lait ka let u bynriew haduh ban poi uta u Ksiang ne u syiem Simpah. Ia kine ki jing'iathuhkhana lah ban shem ruh ha ki kot ki sla kiba ki nongthoh Khasi ki la thoh. Kum ka nuksa ngi shem ha ka kot Ka Tynrai u Khasi ba ki iathuhkhana pateng la pateng ba la thoh da u Keni-Nongbsap, pyrtuh myntri lynnong 31 sla 16. "U Syiar uba khlem jaiñ khlem nep uba shong hapoh krem maw ba tap da ka lamet-latang."

'Ki Khana bad u Sierlapalang ba la thoh da u Primrose Gatphoh ka lynnong XXV (U 'Rangiarkhad, Ksan dorbar Don korbar) ka sla 99.

"Une u khun ka lymboit ka lymbiang, U khun ka kup shiteng ka phong shiteng, U 'Rangiarkhad na kremlamet na kremlatang,.....u la ong ba u long u bahok u batlem."

'Ki khanatang u Barim' ba la thoh da u H. Elias, S.D.B., ha ka lynnong banyngkong (Ki khun ka ramew) ka sla ba 7. U Nongthoh u iathuh ba ka dorbar ka phah ia ka dkhoh ha kata ka jingdum ban leit wad ia ka jaka shong u syiar uba khlem da poi ha kata ka dorbar.

"Ka Dkhoh de ka la her thur bad ka la jah ha kata ka jingdum synia. Tang shiphang ka la wan biang bad ka

la ong : “ Ko kynrad, ko bakhraw batri baroh, u syiar u don hapoh krem.”

Ngi iohi namarkata ba u Khasi da ki khanatang jong u, u iathuh ia ngi ba u syiar u khun ka lymboit-lymbiang uba dang hok-shida u wan mih na kremlamet-latang ban long u nongkit pop shipor ia u bynriew haduh ban da poi uta U KSIANG ba la kular uba dei u khun u Blei. Ka jingkhraw ka pyrkhat pyrdaiñ jong u longshwa u Barim ka long kaba palat-liam ia ka jingsngewthuh jong ngi ki 'riew mynta ba ha kaba u ai ia kane ka khanatang ba u seng ia ka Niam ka Rukom u bynrap lang ia kata ka pharshi shaphang uta u Ksiang bad u iathuhlypa ba ia uta u Ksiang yn kha lane un wan mih na ka krem bad un long u baduk batoi u lymboit u lymbiang, wat la katta ruh un long pat u bashida u bahok u batlem khlem ka thoh ka tar, ka kjap ka star, ka braiñ ka briah.

Ka long kaei kaei kaba phylla katta katta iangi ban shem ha kane ka juk ba mynta ba ym don wat tang uwei ruh u nongseng niam uba ngi lah ban ong ba katei ka pharshi jong u Khasi ne ka jingiathuhlypa ka la urlong lait tang ia u Jisu U Nongseng jong ka niam Kristan. Haba ngi pule ia ka jingim jong u Jisu ngi shem ba la kha ia u harud 'nong jong ka 'nongkyndong Bethlehem hajan ki lum bad ki them sharai blang kaba don kumba 5 mer lane 8 kilometer na ka sor bah Jerusalem. La kha ia u ha ka krem maw ba ju rieh tngen ki blang ki masi. Ka kremlamet-latang kumba ong u Khasi. Nangta pat ngi tip ruh ba ki kmie ki kpa jong u ki long ki baduk bakyrduh kumta kim don jaiñ don nep ban sop ban spaifi ia une u khyllung Jisu. La shu sôp ia u madei mata bad ka jingkhriat jong ka miet ka dung ka sam ia ka met balung jong u. Une u Jisu uba ong ialade ba u long u

khun u Blei u wan ha ka dur u rit u ria u baduk shisha kumba ong u Khasi u khun lymboit u khun lymbiang shisha. Hynrei wat la u long u khun lymboit-lymbiang ba la kha ha krem pynban u long u bashida u bym don ka thoh ka tar, u bahok u batlem u bym don ka braiñ ka briah. Ka jingñathuhkhana shaphang une U Jisu ka ñathuh ña ngi ba la pun ña U na ka 'theisotti ha ka dur baphylla. Kata la pun ña u na u Blei hi da ka bor baphylla jong u Blei. Bad Une u Jisu ynda u la rangbah u pynshisha da kaba ong 'Ba nga long u Khun u Blei' (Matt. 27 : 43) Ka niam Kristan ka ñathuh bad pynshisha ba u Jisu u long uba khlem thohbria eiei ruh, Kane ka jingpun baphylla ña u ka long ka jingmaia kaba kito kiba kwah ban tip janai ki lah ban kylli bniah na ki nongialap ka niam Kristan. Ha U Khasi kum kine ki jingmaia kim long kiei kiei kiba pynlyngngoh ña u shaba palat, namar wat ña ki syiem shyllong ruh u Ngeit ba ki mih na kata ka briew baphylla kaba ki tharai ba ka dei ka khun u 'Lei shyllong lane ki syiem synteng na kata ka Lidohkha ba u woh Ryndi u ngat na 'Wei-Khyrwi.'

(Ng) KI DAK KI SHIN KA DORBAR.

Sa kawei pat ka pharshi kaba u Khasi u la bynrap ha ka khanatang shaphang u syiar shwa ba un seng ña ka Niam ka Rukom ka long ba shwa ba u syiar un leit paw sha tyngkong ka sngi, ka dorbar ka la ai ha u ña ka rong ka rup ka khor ka khriam. Kane ka jingong kumba ngi ñohi mynshwa ka la don ruh ha ki jingthoh jingtar kiba ki nongthoh Khasi ki la thoh. Ngì shem ña kane ka jingong harum kaba u Rev. Fr. H. Elias u la thoh ha ka kot jong u 'Ki Khanatang U Barim' lynnong I (ki khun ka ramew) ha ka sla 7 bad 8.

“Baroh ki la ia ai katba k_i iadon ei U Briew u la ai ka sponghor-spongrusom, bad kiwei kiwei pat ki la ai ka kup ka sem, ka rong ka rup, ka sop’ti sop’jat.”

U Primrose Gatphoh pat ha ‘K_i Khanatang bad U Sierlapalang’ Ka lynnong VI (Ka kremlamet ka krem-latang ka sla 18 u ong, ba kata ka dorbar ka la ai ha u syiar ia u tdong-rynñiaw, ia ka khor ka khriam kaba biang bad ia u shyrtong u basaw bha katkum ka kular madar jong u syiar ban long u nongkit pop na ka bynta u bynriew. Kumjuh ruh u pyrtuh myntri u Keni Nong-bsap ha ka kot jong u ‘Ka Tynrai U Khasi ba ki iathuh-khana pateng la pateng’ ha ka lynnong 33 ka sla 16 u ong ba kata ka dorbar ka la ai ia u syiar ka khor ka khriam, ka ksiar shroh ksiar shrong, ka riam ka beit ryngkat ka duwai ka phirat.

Ngi lah namarkata ban kyllum lang ia kine k_i jingthoh baroh ba ka dorbar ka la ai ia u syiar u khun lymbait lymbiang kata ka sponghor-spongrusom ka khor ka khriam, ka ksiar shroh ksiar shrong — u shyrtong basaw bad ka rong ka rup. Ia ka pharshi ne ka jingiathuhlypa jong u Khasi ha katei ka khana kam long kaba eh ban sngewthuh lada ngi pyrkhat khyndiat

Haba ong ka jingai ka dorbar, ngi sngewthuh ba ka dei ka jingai jong u baduk bad jong u bariewspah, uba najan bad uba najngai namar ha ka dorbar hi la ju wan poi lut u jan u jingai u duk u riewspah. Ka ktien ‘ai ka khor ka khriam’ ka mut ki jingai bakordor kaba dei ia ki kynja bakhraw ne kynja syiem. Ka ktien ‘ka rong ka rup’ ka mut ka rong ka dur, ka rong hi khlem ka dur ka long lymbiang. Kumta ka jingmut, ‘ai ka khor ka khriam ka rong ka rup’ ka mut kata ka jingai bakordor kaba ia-dei bad ka dur ka kyrdan. Ngi sngewthuh shai namar-

kata, ba ka pharshi ne kata ka jing*i*athuhlypa u Khasi ka long ba ka dei ban don kata ka jingai burom-nguh-burom *i*a uta u Ksiang uba long U Khun u Blei, da u jan u jngai u duk u riewspah. Ka rong khlem ka rup ka long kaba lymbiang, kumta ruh ka jingkular khlem ka jing-pyndep-pynbiang ka long kaba lymbiang. Hato ka niam Kristan ka pynbiang *i*a kane ka jingkular u Blei kaba u Khasi u khmih lynti la slembah ?

Ka niam Kristan ka jubab *i*a kane ka jingkylli bad ka kubur ba ka pynbiang *i*a kane ka kular. Na ka jingim u Jisu ngi tip ba ka la don kane ka nguh burom-ai-burom *i*a U Jisu shwa ba un long uta u nongbah khala *i*a ka lait ka let u khun hynriew da u jan u jngai u duk u riewspah kum ha kata ka dorbar hyndai. Nyngkong eh tang shu kha *i*a U Jisu, ki Angel ki la paw ha bneng ban pynbna ba uta u Ksiang u don ha ka krem ki da iathuh kyrpang ruh *i*a kita ki kynhun ki nongaplangbrot ki baduk bad kiha don hajan kata ka jaka. Ha kata ka jingdum jong ka miet kita ki Angel ki la rwai da ki sur bathiang katta katta ban pyndonburom *i*a u bad u khlur u baheh da ka jingtynshai*n* baphylla u la paw ha sahit bneng-ban sakhi *i*a kata ka jingshisha. Kita ki nongaplangbrot ki la leit mardor sha kata ka krem ki da nguh da dem *i*a uta U Jisu bad ki da ai ki jingai sngewbha jong ki katkum ka jinglah jong ki ha la ka jingduk jingsuk jong ki, katkum ka kyrdan jong ki ryngkat ka duwai ka phirat *i*a u Blei. Kiwei pat ki briew ki bariewspah bad kiba don sha jngai na kata ka jaka ba kha *i*a U Jisu ruh ki leit sha kata ka krem ban ai *i*a u Jisu *i*a la ki jingai sngewbha jong ki kum kata ka dorbar hyndai, kine ki dei kita ki laingut ki riewstad ba riewspah na ka ri mihngi. Kine ki riewstad ki la sei bad ai la ki jingai sngewbha barem-dor jong ki,

ha kata ka krem hi. Ka jingai kaba ju ai tang ia ki kynja syiem hi bad kita ki jingai ki long 'Ka Ksiar, ka Jingiewbih (kaba ki ioh na ka khleñ dieng ba la khleh lang bad ka umphniang) bad ka Mir lane ka Myrrh (Ka kynja um ba pnah kum ka rong sohñiamtra, kaba iewbih bad ñiar eh ban ioh, kaba ki pyndonkam kum ka jingpynsleh). Kane ka jingai jong kine ki riewstad laingut ka iasyriem bad iadei shikatdei eh bad kata ka khor ka khriam ka rong ka rup kaba la ai da ka dorbar hyndai ia u syiar. Ngi iohi namarkata, ba ka la don kata ka jingai burom-nguh burom da u jan, u jngai, u duk, u riewspah ia U Jisu. Nalor kane ngi tip ruh na ka jingim u Jisu ba shwa ba un iap ki paidbah jong ka sor Jerusalem ki la pdiang burom ai burom ia u ha ka por ba u rung ha kata ka sorbah da kaba ki siang ia la ki jaiñ baremdor jong ki ha lynti syngkien kaba dei ban iaid U Jisu, ki la iarah kynhoi burom ia u kum u Syiem. Kane ka jingjia ha ka jingim U Jisu ka iadei thik bad kata ka jingspongkhor-spongusom kaba thew ia ka jinglong khraw ne jinglong Syiem jong uta u Ksiang ba la kular. Shuh shuh shwa ba U Jisu un long u jingknia ialade na ka bynta u khun bynriew la pynphong ia u da ki jaiñsaw bad pynbat ia u khah ha ka kti jong u bad la phngian jubor ia kawei ka pansngiat shiah halor ka khlieh jong u haduh ba la saw haiñ ka khlieh da ka snam ba mih na kata ka jingdung kita ki shiah banep ban pynbiang ia ka jingiathuhlypa. U Khasi shaphang uta u shyrtong oh-shrong basawbha.

(h) KI DAK KI SHIN KA BISHAR.

Ngi la iohi ba ka jingiathuhlypa jong u Khasi ha ka dur ka pharshi shaphang u Ksiang ka la urlong kawei hadien kawei pat, hynrei u nongthoh u iamynjur bad phi

ki nongpule ba donkam ban pyni shuh shuh sa ia kiwei pat ki jingⁱathuhlypa kiba don ter ter ha kane ka khana-tang jong u Khasi. Ngi la tip ba u syiar u khun lymboit-lymbiang na kremlamet-latang bad kata ka dorbar dorsha ka la ai ia u kata ka khor ka khriam ka rong ka rup shwa ba un leit paw sha tyngkong ka sngi. Nalorkata, ngi tip ruh ba u syiar u la ong ha kata ka dorbar ba ma u, u long u batlem u bahok bashisha kumba la buh la pyn-long da u Blei hi. Kata ka dorbar ka la bishar ia u syiar bad ka la shem ba u long shisha kumta. Hadien ba ka dorbar ka lap ia kata ka jingshisha u syiar u sa long uta u jingknⁱa ban long u nongkit pap na ka bynta u bynriew. Ia kane ka jingshisha haneng la pynshisha ruh da u Primrose Gatphoh ha kaba u ong :

“ U la ong ba u long u bahok, u batlem, bad un kit khlieh ma u ia ka ban bishar hok ia kane ka kam. U la kohnguh ruh ban shah pied ia la ka kpoh, bad ban khlaw ia la u dohnud bad u rwieng jong u, hakhmat ka dorbar, bad un shah ryndang ma u ia ka lait ka let u bynriew baroh. La tohkit bad la khmih bniah ia u hangta, bad la shem ba u long shisha kumta.” Ki Khanatang, bad u 'Sierlapalang, Lynnong XXV (U 'Rangiarkhad, Ksan dorbar don korbar ka sla 99).

Da katei ka pharshi, u Khasi u iathuhlypa ia ngi ba uta u Ksiang uba dei u khun u Blei u dei ban shah bishar ha ka dorbar bad un sakhi da la ka jingim ba u long u bahok, batlem bad un long dalade hi uta u jingknⁱa kumba long u syiar ban bah khala ia ka lait ka let u khun bynriew shikhrum ka bneng shityllup ka pyrthei ban bteng biang sa shisien pat ia kata ka jingkieng u sohpetbneng.

Haba ngi bishar bad peit bniah na ka jingim U Jisu,

u Nongseng ka niam Kristan ngi shem ba une U Jisu u la pynpaw shisha ha ka jingim jong u ba u long u khun u Blei namar dalade hi u ong 'Ba nga long U Khun u Blei' (Matth 27 : 43). Kane ka jingong jong u ka pyni shai ba u long u bakhuid u batlem bad u da sakhi ruh ia kane ka jingong jong u da ki ktien bad ki kam ba u long u banang u batip, u balah u baiiai. Kum ka nuksa ngi tip ba haba (une) U Jisu u dang 12 snem ka rta u la nud ban iasaid nia bad ki tymmen ki san jong ka jait jong u haduh ba ki la lyngngoh ngaiñ (Luke 2 : 41-47). Nalorkata u la nud ban iathuhlypa shaphang la ka jingiap bad ka jingmihpat la jong kaba la urlong shisha thik kumba u la ong (Mark 9:30 & 16:6). Ym tang katta u la nud ban iathuhlypa ba ia ka nongbah Jerusalem yn sa pynjot thiaw bad bun kiwei kiwei kiba ngi shem mynta baroh ki la urlong lut.

Kine baroh ki pynpaw shai ba u long u khun u Blei u banang u batip, bad ka jinglah ka jingiai jong u kum u khun u Blei u sakhi da kaba pynkoit ia kiba pang u pynmih pat ia ki baiap bad u bsa ia ki san hajar ngut ki paidbah ha ka ri kynjah tang da ki ar tylli ki dohkha bad san tylli ki kpu. Kum kine ki kam bah u Jisu u la leh bun bun tylli ban sakhi bad pynurlong ia ka jingong u Khasi hyndai ba u khun u Blei uban long u Ksiang un long uta u banang, u batip, u balah u baiiai.

Nalorkata, (Une) U Jisu u la shah bishar ha ka dorbar kum uta u syiar hyndai ha ka khanatang u Khasi (Math 14 : 53-64) ha kaba u la phla shai kdar ba ma u, u long u khun u Blei bad u la sakhi ia ka ka jinghok jingtem bad jinglong khun u Blei jong u da kaba aiti la ka jingim bad pjiar la ka snam kum ba la iathuhlypa u Khasi hyn-dai ha ka dur u syiar.

Ngim lah namarkata khlem da mynjur ba (une) u Jisu u dei uta u Ksiang ba la kular bad ba u dei u Khun u Blei hi kumba la kular da u Blei ha u Hynñiewtrep-Hynñiewskum. Baroh ki dak ki shin ba la pharshi da u longshwa ki iadei thik bad ka jingim jong (Une) u Jisu bad kumba la iohi mynshwa, (Une) u Jisu dalade hi U pynskhem ia ka jingngeit jingtip u Khasi hyndai namar dei ma U, u Nongkular, dei ma U, u Nongpyndep, Nong-pynskhem kumta ka jingong jong u ka long ka jingshisha. "Wat mut ha nga la wan ban pynduh-pyndam noh ia ku aii ne ki nong'iathuhlypa : Ngam shym wan pynduh-pyndam, hynrei ban pynhiang" (Math. 5 : 17.)

Ka shai te kum ka sngi bad khlem riej u Khasi u dei ban ong ba ka niam Kristan ka la wan ban pynskhem pynshisha ia kaei kaba u Khasi u ju tip ju ngeit naduh hyndai hynthai. U Khasi bad la ka niam bakyntang jong u, u long u khun ka jingshai, uba khamshai ban ia u Kristan uba don ka tip-blei, khlem ka tip-briew.

(i) KI DAK KI SHIN 'KI LAI.'

Kawei na ki jing'iathuhlypa kiba u Khasi u 'ai hangi ki longdien da ki pharshi kumno ban ithuh ia uta u Ksiang ba la kular, ki long ki 'LAI' :

Kawei na ki ka long ba ha kata ka dorbar dorsha u syiar u la kular ban bteng biang ia ka jingkieng sohjet-bneng ka jingiadei u briew bad u Blei.

Kaba ar pat ka long ka jingleit jong u syiar sha ka tyngkong ka sngi sha duwar u Blei, ban iasaid na ka bynta ka lait ka let u khun bynriew.

Kaba lai pat ka long ka Jingaiti u syiar ialade hi ban long u jingknia na ka bynta u khun bynriew halor ka jutang ba ka sngi kan wan ban pynshai ia ka pyrthei.

Ha kane ka bynta kaba hadien u syiar u iathuh ha u khun bynriew ia ka jubanlak ba u la khlei, kata, laisien un thap ki kti bad laisien un kynih hapteng kata ka jingdum synia bad kan shai ka pyrthei kdar. Kane ka dak ba u syiar u ai ka long ban pyntip ban sakhi ia u khun bynriew ba la skhem ka jutang hapteng u briew bad u Blei, kata ka jingkieng sohpetbneng ka jingiadei hapteng u briew bad u Blei kan wan biang sa shisien pat.

Mynta lada ngi phai sha ka niam Kristan ngi skhem ba ha ka jingim U Jisu u la hikai la ialap kumba lai snem bad ha kine ki jingialap jong u, u la iathuhlypa laisien laiwat shaphang ka jingiap ba un long u jingknia batlem na ka bynta ka lait ka let u khun bynriew. **Nyngkong:** "u Khun.....bad ba yn pyniap, bad ha kaba lai sngi ban mihpat" (Luke 9 : 22. Math 16 : 21-5, Mark 8 : 31). **Kaba ar pat** "Te baroh.....to buh jingkybmaw ia kine ki ktien ha ki dohnud jong phi : Ia u Khun u Briew yn sa aiti-noh ha ki kti jong ki briew. Bad kin pyniap ia U," bad ha ka sngi kaba lai un mihpat.....(Math 17 : 21-22, Luke 9 : 44, Mark 9 : 30). **Kaba lai pat** "Naba yn aiti noh ia U ha ki Jentil, bad yn rkhe-bein bad yn sympat, bad yn bynthiew; bad ynda la sympat, kin pyniap ia U; bad ha ka sngi kaba lai, Un mihpat" (Luke 18 : 32-33. Math 20 : 17-19, Mark 10 : 33-34).

Nalorkata, ngi shem ba u la shah shitom lai kynta halor ka diengphna hapteng ka jingdum synia baphylla jong kata ka sngi (Math 27 : 45; Mark 15 : 33; Luke 23 : 44) bad ynda u la iap u sah lai sngi hapoh jingtep shwa ban mihpat.

Hato kine ki lai snem ki jingialap jong u, ki laisien laiwat ki jingiathuhlypa jong u shaphang la ka jingiap bad ki lai kynta ki jingshahshitom jong u halor ka dieng-


phna shwa ba un iap kim long kita 'ki lai' ne laisien laiwat ki jingthapkti u syiar ban pynkhreh ialade shwa ban kynih. Bad nalar kata, ki lai sngi ba U Jisu u sah hapoh jingtep badum, shwa ba U Jisu un mihpat ban sakhi ba la pyndep ia ka jingkular bad ban pynshisha ba ma U, U dei u khun u Blei ba la kular kim long mo ki dak ki shin ba shai tyngkreiñ kiba u syiar ha ka jingdum synia u phla ia la ka jubanlak ha u khun bynriew.

U syiar ngi shem ba u kynih bun wat ha ka jingdum, man la ka step, shwa ban mih shai ka sngi, hynrei u Khasi u ong laiwat namar u kynih ha ki lai bynta kata ha ki lai por lah ban ong. Kumjuh ruh ngi lap ha u Jisu U kren u kynih u phawar bun wat nalar ka diengphna ha ka jingdum baphylla jong kata ka sngi, hynrei ki jingkreng jong u ki long ha ki lai bynta, lai jingmut. Kaba nyngkong ka long ka jingkular jong u Jisu ia ka jingsuk-bneng, kata ka bteng biang ia u sohpetbneng ka jingiadei hapdeng u briew bad U Blei ha u bynriew bakylla kaba mut ne phai sha U Blei kumba u syiar u kular ban bah khala na ka bynta u briew. "Shisha Nga ong ha me : Mynta ka sngi men long ryngkat bad nga ha paradise (Bneng) (Luke 23:43).

Kaba ar pat ka long ka jingiasaid jong u Jisu hakhmat U Blei na ka bynta u khun bynriew, kumba la pharshi lypa u Khasi ha ka dur u syiar. "Ko pa to map ia ki, namar kim tip ia kaba ki leh (Luke 23:34)"

Kaba lai pat ka long kata ka jingaiti jong u Jisu ialade ban long uta u jingknia na ka bynta ban lait u khun bynriew "Ko Pa, ha ki kti jong Me, Nga aiti ia la ka mynsiem" bad haba u ong ia kane, U la dkut mynsiem. (Luke 23 : 46)

Ka Balang Kristan ka fathuh ba naduh kata ka por ba U Jisu u la iap la don kata ka jingiasuk hapdeng u



briew bad u Blei. Kata ka jingkieng u sohpetbneng la
 bteng biang sa shisien pat. Ka jingkular u Blei ha u khun
 bynriew u Hynfiiewtrep-Hynfiiewskum ka la urlong. Mynta
 ka shai kdar ha ngi u Khasi ba ka jaitbynriew jong ngi dei
 kata ka jaitbynriew kaba u Blei u la ieid kyrpang eh bad
 lah ban ong ba u Blei u kham ieid ia u Khasi ban ia ki
 Jiw namar u Khasi khlem ka thoh ka tar lymne ki nongia-
 thuhlypa u la lah ban pynneh ia une u phniang jong ka
 jingshisha baroh da ka sap bakyrpang kaba u Blei u ai ha
 u. Ka niam Kristan ka wan ban pynskhem ia kaei kaei
 kaba u Khasi u ju tip ju ngeit bad ia kaei kaba ki long-
 shwa, u Barim, ki tymmen hyndai ki khmih lynti la slem
 bah.

LYNNONG 2

KA YAPTRAM U 'NLANGTHYLLIEW 'NLANGKHAR, 'NLANGPYRSIT BAD KA TARO.

Ka jingíathuhkhana u Khasi hyndai ka iathuh ía ngi ba u 'Nlangthylliew 'Nlangkhar bad u 'Nlangpyrsit ki shong ki sah ha ri thor. Kine baroh lai ngut shipara ki la sliang dik dik ban wan kiew sha kine ki lum Khasi ban her ha ka lyer bad ban tuíd ha ki wahduíd basngur khlir khlir kiba u Hynñiewtrep u Hynñiewskum u dih shngiam. Ka lver da ki thapniang ka jingiewbih synlar jong ka, ka íai kdup íai da ía ka ri Khasi baroh-kawei ka khang íap khang im ía kine ki lai ngut shipara ban wan íuh kjat ha kine ki lum bakyntang ki blei. Kane ka dei kata ka por ka jingsuk jingsaíñ jong ka Sottijuk. Hynrei hapdeng kane ka jingsuk jingsaíñ la leit jia kyndit ba u Hynñiewtrep u Hynñiewskum u la rvngkang u la palat ía ka hukum u Kynrad, kumta soit kiew ka Sottijuk sha bneng bad kdum la hiar ka Kulijuk sha thian ban shong kulai halor ka pyrthei mariang. Ka tieng ka smiej. ka bishni ka pihuíñ, ka sniew ka smeh kaba laiphew-jait laiphew-skit ka la sdang ban jei halor kine ki lum Khasi. Dei ha kane ka juh ka por ba u 'Nlangthylliew, u 'Nlangkhar bad u 'Nlangpyrsit ki la íoh ban pynhun ía la ka

jong ka jingthrang kaba ki la angnud la slem. Baroh laingut shipara ki la iakiew sha ki lum Khasi ryngkat bad kiwei kiwei ki laiphew-ksuid laiphew-khrei kiba wan ban pynshitom jynjar-lanot ia u Hynñiewtrep u Hynñiewskum. Ha kane ka por ka lyer kam don por ban kdup ban da ia ka ri Khasi da ka stieh ka jingkhuid synlar kumba ka ju leh ha ki por mynshwa namar ka dang hum kam eh ha kaba ialeh ban pynkhuid ia ka met iap ka kmie jong ki ka Ramew.

Ynda haba kine ki lai ngut shipara ki la iaid lyngba ki pyntha jyrngam baiar jong ka ri thor ki la poi ha ki pud jong ka ri Khasi. U bapdeng bad u khatduh kata u 'Niangkhar bad u 'Niangpyrsit ki la jam bran bran bad khuk khak ki la kiew ia ki riat ki ram ki da hiar arsut ia ki lyhuh ki them bad lyngba ki jur bakvllaiñ khong-waiñ ki ia jam wut wut khlem kyrtiang dien. Hynrei u hynmen 'rangbah jong ki kata u 'Niangthylliew u la kham suki khyndiat ban kiew ia ki sharing lum jong ka ri Khasi wat la ha ka jingshisha u bapli u pyrshang tynggeh ban iaid stet khnang ba un iaryngkat bad la ki para. Hadien ba u la iaid lyngba kumba katto katne ki lum u la poi ha ri War bad na ka daw ka jingthait ba la nang ban shop da ka jingshit jong ka sngi u la ieng kyrshan syngkai ha kliar uwei u lum bad u phai dien ban peit ia ka ri thor. Da ka jinglyngngoh ka bakhraw u la iohi ia kawei ka 'thei samla kaba bhabriew lymphuñ kaba iaid bran bran ha ka lynti kaba iaid ma u, imat ka buddien ia u. U ñiuhkhlieh jong ka u stem kmur kmur kum ki sai ksiar banoh rymphai haduh khongdong 'jat bad teng teng u her ha ka jingbeh ka 'er pyngngad ban pynphuh pynphieng shuh shuh ia ka khmat lasubon jong ka. Ka jingshit jong ka sngi bad ka jingthait ka lynti ki pynsaw kyrang

ia ki ngab jong ka kum ka syntu Latuthing ('tiew saw) bad ki rymmiang shyntur bajlih jong ka kiba i kumba la kyl-lan umphniang bha ki saw-jungum kum ki shylluit 'tiew diengsong blad rong. Ka sopti jynsur balieh stang iar iar ka dam bit sbak ha ka met jong ka na ka jingbeh ka lyer ban pynpaw shynna ia ka dur ka dar bhabriew ba-iphien jong ka met jong ka.—Wow ka jingbhabriew, la pyrkhaw weibriew u 'Niangthylliew bad u phai artat ban ia'id noh ha la ka lynti, hynrei hamar kata hi ka por kata ka 'thei bhabriew ka ai dak ia u ban ap lem ia ka, ma u pat u jam la ka jam stet ha la ka lynti ban lap ia la ki para bad ma ka pat sia sia ban lap ia u. Khatduh u 'Niangthylliew shwa ban jam kut ia u pud ka ri War u la shong thait ban bam kwai, ngong la lap kata ka 'thei bhabriew bad ka ong, "song kwai lem ia nga,". U 'Niangthylliew pat ba dang thait eh u jubah u ong, "Pham nang bam hi?" Hangta la kiew saw kata ka 'thei bhabriew bad da kaba pyndem la ki niuhmat sha thian ka la sdang ban kheit hi ia uta u tym pew. U 'Niangthylliew ha kane ka por u dang khur ia la ka syep na la ka shyllangmat da ki shympriah'ti bad khlem da poi pyrkhaw u kum synreit pharait ia kata ka syep halor uta u tym pew uba kata ka 'thei bhabriew ka dang mut ban dkhat bad mar kumta hi iaptram lut uta u tym pew baroh shitynrai, bud sa ka iaptram jong baroh ki tynrai tym-pew kiba don ha kata ka bri. Nangne ong ki 'riewtym-men ha ki khanatang u Khasi ba la sdang ka iaptram ki tym pew ha kylleng ki jaka rep tym pew.

Ka thait ka jrem bad ka jingshah dumok khlem poi pyrkhaw jong kane ka 'thei bhabriew ha une u 'rang khatar-bor ka la pynmeh ding lep ia ka bapli. Ka ding mawleif ka thait ka jrem ka la nangbur da ka jingshah

dumok bad la tei prew tei dieng iap shuh shuh da ka jingkhlem akor jong u haduh ba ka la duh wat ban bam kwai. Ir klang ka ding bad kata ka 'thei bhabriew kam lah kan shuh bad ka la dumok kyliang ia u phak. "Dut khlem raiñ, me leh bymñiew briew ia ei? Me shu ibeiñ ikhoh tang na ka daw ba nga dei ka kynthei tlot bor? Me tip nga dei kaei? Men siew bai mynraiñ-khmat ia kane ka jingleh ibeiñ jong me ia nga hakhmat kine ki para jingthaw baroh." Ka da jer da shim sakhi ia ki dieng ki siej ki phlang ki kynbat, ki syntiew ki skud baroh kiba don sawdong jong ka, ki ruh ki sngewlem sngewsynei ia kane ka kynthei bapli. "Naduh mynta," la bteng ktien kata ka 'thei bhabriew, "ha kano kano ka thliew iing kaba ma me ne ki para jong me kin rung kan don ka shit ka syang, ka lynga-pisa, ka daitbuid kwah trud. U bynriew un ym hun un ym suk shuh ia me ne ki para jong me, kumba ju long ha ki por mynshwa." Katba ka kren ia kine ki 'tien pynhiarkput ka dur ka dar bhabriew jong ka ka la kylla bak-ly-bak sha ka dur baitriem kynsha bad u 'Niangthylliew u la ithuh shai ba kane ka 'thei bhabriew dei ka Taro. Dei naduh kane ka por ong biang ka khana u Khasi ba sa don ka shit ka syang, ka lynga-pisa, ka daitbuid kwah trud haba mih 'Niangthylliew, 'Niangkhar ne 'Niang-pyrsit.

Hadien kane ka jingiakynad ka Taro bad u 'Niangthylliew ki la leit noh ha la ka lynti lynti. Na kane ka khanatang u Khasi ngi tip ba ka jingsniew ba har rukom ka la wan kiew sha kine ki lum Khasi ynda haba u Hynñiewtrep u Hynñiewskum u la palat ia ka hukum u Blei.

Hadien ba ka Taro ka la tim ia u 'Niangthylliew ka

la leit shong basa noh ialade ha iing ki Khynriam kiba la pxiang sngewbha ia ka halor ka kular madar ban pynroi-pynman bha ia ki lada ki mynjur ban ai jaka shong jaka sah ia ka. Kata ka iing kaba khot sah ia ka Taro ka la roi la man bha shisha ha ka liang ka spah ka phew, kumta bun bun ki Khynriam ki la khot shong ia kane ka Taro. Hynrei ynda la dap laiphew snem kata ka Taro ka la pan niam pan rukom na ki Khynriam kiba leh kuman ia kata ka jingdawa jong kata ka Taro. U soh jong kane ka jingbymkheif briew ki Khynriam ia ka jingdawa ka Taro ka long ka jingpang jingjhia bad wat ka jingiap ha kito ki iing kiba ka shong. Ki Khynriam ki la shat la kheif halor kane ka jingjia khyllah sngi bad la kup la shai ba dei ka jingleh kata ka Taro. Ynda la poi kat haduh kane ka khep, ki Khynriam ki la lum kur lum kha bad ki la wad ka lad ka lynti kumno han loit han law ia kane ka jingsniew. Ka kheif ka bishar ka iathuh ba dei ban leit bret noh ia kiei kiei baroh kiba ki don, kata ka spah ka phew ka ksiar ka rupa ka iing ka sem khlem pynsah shuh wat tang i barit tam. Ki Khynriam ki la shah shkor ia kane bad ynda ki la lum lut khait kat kiba ki don ki la leit lang sha Puriang baroh shi kynhun para ba ia ngat ha ka juh ka shrip bad ki la ia bret lut khait hangta. Naduh kata ka por haduh mynta mynne ym ju kham iohsngew koit ban dang don ki Khynriam kiba ri Taro.

Ki Pnar kiba leit iew leit hat ki la iohi ia kata ka spah ka hajar ka bym ithuh ithaw shuh bad khlem da tip aiu ki leh, ki la ia khar ei bad leit kit sha la iing la sem. Naduh kata ka por haduh kine ki sngi ka Taro ka sa ioh shong ioh sah bad ki Pnar namar kata ka Taro ka leit bud ia kita kiba khar ia kata ka spah ka

hajar na Puriang. Kita ki Pnar kiba la khar ia kata ka spah ki la man bha shibun eh ha ka liang ka spah ka phew. Hynrei kumba la jia ha ki Khynriam kata ka Taro ka la pan niam pan rukom na ki pnar ruh. Ma ki pat namar la roi ka spah ka phew ki la ai niam ai rukom ia ka. Don kiba ai da ka blang don pat kiba ai da ka syiar katkum ha la ka jingiapan iapan. Kane ka Taro ym tang ba ka pynroi ia ka spah ka phew hynrei ka pynshitom ruh ia ki nong ri lada kim lah ban pynbiang ia ka jingkwah jong ka. Ka Taro ka leit ruh ban dait ia kito kiba shim ram na kito kiba ri ia ka lada kim leit siew, lane ba kito ki nongri ki ud ki nam ha ka na ka bynta ka jingbym wan siew jong ki ia kata ka ram ba ki la shim. Haba ong badait ka Taro ka mut ba kito kiba shim ram ki ioh ia ka jingpang Taro. Ki briew ki lah ruh ban ioh ia ka jingpang Taro ym tang haba ki shim ram shim shah, hynrei wat lada ki shu iaieid ia sngewbha ne teng teng wat lada kito kiba ri ki ibha samla ruh lah ban ioh ka jingpang Taro.

Haba ka briew ka ioh ia ka jingpang Taro u Nongsumar ne u 'riewtymmen ba shemphang u ithuh shisyn-don tang na ki dak ki shin ka rukom leh ka nongpang, kum ka nuksa ka nongpang ka ju peit shaiñ ia uno uno ne kano kano napdeng kito ki nongwan peit pang, ne teng teng pat ka leh isih ne itieng ia uwei pat bad ka kren ruma rutit kum kito kiba ioh ka jingpangshit ka bajur. Ka babud pat ia kine ki jingleh khyllah ka long ka jingring ka bajur haduh ba i kumba kan phai pyrdet sa ka khlieh. Ka Taro ruh kum u Thlen ka kham sngewtynnat ban leit dait ia kiba ar-met. Kawei ka baphylla eh ha ka jingpang Taro ka long ba u Nongsumar u dei ban iatainia ne kylli jingkylli na kato ka nongpang kaba

kren bun kiei kiei kiba sngewphylla. Ka jingiasaid nia ka long kaba kyllaiñ bad thaiñ jyrwit katta katta bad lah ban ong ba ka palat ia ka jingiatainia ki muktiar ha ing shari, hynrei u nongsumar bastad u pynphla wo ia ka jingshisha bad wat ia ka kyrteng jong kito kiba ri ia ka bad na ka daw aiu ba ka wan pynshitom kumta. Shisien ba u nongsumar u sngewthuh ne lap ia ka daw kata ka jingsumar ka la kloi la suk, lada dei ba ka shu wan kai sngewbha ba iaieid iathoiñ ne ba ibha samla kata u nongsumar u shu kren shu khana bad song tang da u kwai ruh ka la biang, hynrei pat lada dei ba don ki daw kum kaba shim ram kata u nongsumar un hap bau on Taro ne pynkhuid Taro hadien ba ki la leit pynphai ia kata ka ram katkum ka jingibit ne sngewhit u nongsumar.

Katkum ka jingong u Woh Yata Niangti uwei na ki nongsumar ia ka jingpang Taro uba kham paw ha kine ki por u ong ba ki Pnar palat shnong (ki Pnar na 'nongkyn-dong) kiba ri ia ka Taro kim ju lehraiñ ban ong, ba ki ri namar ki tieng-ïap tieng-im ioh don uno ma uno u stad (nongkñia ne nongsumar ia kito kiba ioh ka jingpang Taro) uba pynphai kylla ne pyndait kylla ia ki trai nongri. Kumta lada don kino kino kiba wan ud wan iathuh ia ki ba ka Taro jong ki ka pynshitom iano iano ki ju shim shi luta ka um uwei u kwai tylli bad san sla u tympew bad hadien ba ki la kyrpad kyrpon ki ai ha kito kiba wan iathuh ba kin leit rah ia uta u tympew bad syrpuð ia ka nongpang na khlieh ha kjat laisien laiwat bad kin wan pynphai pat ia kita ki sla tympew sha kita ki trai, ma ki pat kin sa peit ia kita ki kliar tympew la ki iapstai ne em lada kim iapstai kata ki ong ba kam dei ka jong ki bad ba ka shu pynthame namar kane ka ju long khah khah haba ka Taro

kam kren shai ne ba u nongsumar um lah ban ia said nia ha ka rukom kaba dei, bad lada jia pat ba ki kliar tymphew ki iapstai kata kita ki trai nongri ki kyrpad kyrpon ia ka Taro bad ki nongpang ki koit ki jem na kata ka jingpang. Ki Pnar kiba na Jowai pat imat kim da salia eh lada don ba pynphai kylla ne kim tieng satia ia ka jingiap duh ka iing jong ki bad kim ju kubur ne pdiang mon sngewbha ia kane ka khlemraiñ ba ki ri ia kane ka Taro wat lada ki da ri shisha. Ka leit long kumne imat ba ki kham stad bad shemphang ha kano ka dur ban iada ia la ka longiing longsem na kum kine ki jingjia.

Ynda haba ka Taro ka la leit noh ban wad iingbasa, u 'Niangthylliew ruh u la iaid noh ha la ka lynti bad ynda u la ia kynduh ia la ki para u la iathuh ha ki ia kata ka jingjia kaba u ia kynduh ha lynti hadien kata ki la ia mynjur lang baroh shipara ban ia iaid noh ha la ka jong ka jong ka lynti, hynrei ka jingtim ka Taro ka buddien ia ki kat shaba ki leit ki wan. U Khasi u batip lut shaphang kane baroh na ka shat ka kheif u husiar bad pynshitom ialade ha bun kiei kiei lada jia ba don kiba ha iing ha sem kiba ioh ka jingpang 'Niangthylliew ne 'Niangkhar ne 'Niangpyrsit khnang ba u Blei un map ia u na ka lait ka let kaba u ur u hap kum u briew. Haba mih 'niangthylliew u Khasi u ong ba wan jngoh u 'Lei bah bad haba mih 'niangkhar ne 'niangpyrsit pat u ong ba wan jngoh ki 'Lei rit. Kawei na ka jingphylla kaba u Khasi u leh haba mih 'niangthylliew ne 'niangkhar ne 'niangpyrsit ka long ba ynda baroh kiba shong ha kata ka iing ki la poi u thang ia u syrdep jaiñ lieh ba la jyrthiaw, u da nguh da dem ia u Blei ba u nongpang un thiah suk thiah saiñ, un lait na ka shit ka syang bad na ka lynga-pisa. Ia une u syrdep jaiñ ki ju thang bad pynsyngaw ia ka tdem ha baroh ki

kamra. Don ruh kiba kawang kynting na ka jaka ba ki thang kham bunsien na iingshetja ne na dpei sha ka jing-khang bah ba ju rung ju mih bad ki da peit ia ka dak. Kata ka dak ka long ba lada kata ka syrdep jaiñ ba la thang ne ka ding ka phai khmat sha poh iing kata ka mut khlem pep kan don ka shit ka syang ne ka lynga-pisa, kumta uta u nongkyrpad kyrpon u duwai u phirat biang sa shisien bad u kawang-kynting biang sa shiwat. U leh kumne haduh laisien laiwat kata la ka ding ka thew ne phai shapoh iing. Hynrei lada u shem ba tang shisien kawang ka ding ne ka khmat syrdep ba la thang ka phai khmat sha jingkhong kata u kheiñ ba la bha. Ia une u syrdep ki buh ha kyndong lane ha kano kano ka jaka bad kim ju plie iing shuh shisien ba ki la thang ia u syrdep haduh mynstep. Bad la dang ngir tang shu khie u leit theh ne leit bret shwa ia uta u syrdep ne u dpei syrdep jaiñ lada la ing lut. Ym ju bit ban sar ne kam ne iuh ia une u syrdep. Ia une u syrdep jaiñ ba la jyrthiaw ki ju thang ruh ha ka por ba iaid ka baijong khlieh snem kata ka baijong khlieh kaba wan bad pynthiah pang baroh shi shnong bad ka iaid na kawei kawei ka shnong sha kawei pat. Ia une u syrdep don kiba thang artylli, don ruh kiba thang tang uwei.

Ha ka por ba mih 'ñiangthylliew ne 'ñiangkhar ne 'ñiangpyrsit u Khasi u kyndiah ialade na kaba shongkha shongman, kaba sei tiar sei tar na tnum na tympan, kaba buaid, kaba iamai iatim shi iing shi sem, kaba wan rah ne pynkiew doh im ha iing, kaba shet 'kylla shet sdieh, kaba dih sikret duma bad kaba thie lada don ba pyrta na lynti syngkien ne na phyllaw na mynshem.

Ki Khasi haba ki leit peit leit jngoh ia kita ki bapang 'ñiangthylliew, 'ñiangkhar ne 'ñiangpyrsit kim ju ong ba-

pang 'ñiangthylliew ne 'ñiangkhar ne 'ñiangpyrsit hynrei ki ong ba bhabriew. U Khasi u husiar katta katta ha ki kam ki jam jong u bad u kyndiah ha kane ka rukom haduh ban da lait miet kata 7, 9 ne 11. Dei tang ynda la lait miet ba ki sa sum sa sleh bad kim kyndiah shuh kumba la ong mynshwa. Ka daw jong kine baroh ki jingkyndiah ka long ba u Khasi u tieng ïoh thut u Blei lane thynrei. Shisien ba la thynrei kata ka kam ka la eh. Lah ruh ban iap lada ym biang ka kyrpad kyrpon. U Woh Yata Ñiangti u ong ba ki war ki ju khot ruh ïa u 'Ñiangthylliew da ka kyrteing Sib Thakur ïa u 'Ñiangkhar pat u Bishon Thakur bad ïa u 'Ñiangpyrsit pat u Shindi Thakur.

Ka sah ha ka jingwad bniah (Research) jong k₁ akhia ka ri ban pynshisha ïa ka jingong bad jingleh-jingkam u Khasi, kata,

- (a) Ka Syep ka daw ka iaptram.*
- (b) Ka syngaw ding (Eden) u Syrdep jaiñ (Sailum) ka pynaram ïa u Nongpang 'Ñiangthylliew etc.*
- (k) Ka Ktien ne ka jingduwai.*

LYNNONG 3

U SYIEM BSEIÑ BAD U 'SEIÑ-UM DUH BIH.

Hyndai hynthai kulong kumah, u 'Len lum ki ong dei u syiem ki jait bseiñ baroh, u synshar kum u syiem, u par u kyllaiñ, u pyñieng la ka khlieh kum u syiem. Ha kata ka por lait na u, kiwei pat ki para-bseiñ baroh kim don bih, wat la ki don ki buiat ban puh u tdong ban sympat bad ka met ban khum. Hynrei ynda ka sngi kyllung u bnai kyllung ki la buhrieh ña lade bad kata ka sottijuk ka la leit noh na ka daw ka pop ka sang, ka lait ka let u Hynñiewtrep u Hynñiewskum, bad haba ki laiphew jingthaw ki phet ki krih ha la ki kynhun kynhun sha ki jaka bashngaiñ namar ka tieng ka smiej ka la sdang synshar ña ka pyrthei-mariang kumba ong ka Mynnor, la mih ka jingud jinglynñiar na ki 'seiñrit 'seiñria, ba u Hynñiewtrep u Hynñiewskum u la shu leh thombor bad lehbeiñ ña ki, la ha lum ha wah ne ha khlaw ha btap. Kane ka khubor ka la poi sha ki tyndong shkor jong u 'Len lum uba dang muja la ka thiah-sngi lséng ha la ka jingisaitmet bad iwli, bad mar kumta hi u rah la ka khlieh u da pyrsad bitar kynsan kynsan haduh ba her lut ki sla dieng sla siej. U mih bak na kata ka 'lawbah 'lawsan ba u shong, u par sia-sia lyngba ka raieh-raidam, ka shiah-ka-tram, na khap ki dieng ki siej, nalog u phlang u kynbat, ban wad ña ka kput

ban iada ia la ki para-bseiñ kumba ju leh lem u syiem u kmie. Hadian ba u par stet katto katne por u la poi ha kawei ka khlaw ba don ki samla ba dang ia thohdieng. Suki suki u par bad u kyllaiñ-lwen ialade ha uwei u dieng ba kham sañium sla. Ym slem hadien kata, u la ioh ban puh ia kawei ka samla sotti, bad ka bapli ka la kyllon iap kram ha shen. Ka jingkhlañ ka bih ka long kaba jur katta katta ba ym pat ju don bih bseiñ ka ban khlaiñ kum kata. Da ka jingsngewtynn timer sngewkmen phuhmut phuhmat bym lah ong shuh ba u la ioh ban pynhiarkput ia u Hynñiewtrep u Hynñiewskum, u 'Len lum ha kata ka juh hi ka sngi kum u nongjop thma u la leit phai pat sha la ka khlaw ba u shong u sah.

Ia kata ka janmiet la wan poi ha kata ka 'lawbah 'lawsan u 'Seiñthli bad u 'Seiñstar, ki 'seiñ iaid pyrthei. Na jngai ki la iohsngew ia ka jingpyrsad jur ba-phia-phia jong u 'Len lum, i mat ba u dang thait eh na ka jingwan lynti jong u. U 'Seiñthli bad u 'Seiñstar ki la iohi ia u 'Len lum, u syiem jong ki, ki la kren ia u da i sur bajem ki ong.

"Pa 'iem kynrad, katno ngi sngewkmen ban iohi iaphi. Ngì la ioh jingtip ba phi la leit ban ialeh thma bad u Hynñiewtrep u Hynñiewskum ban iada ia la u paid u hajar na ka jingshah lehbeiñ-lehkhoh. Kumta ngi wan ban ainguh-aidem iaphi bad ban sngap ia ki khana babang-bathiang na ki rymmiang shyntur jong phi kumno ka la long kata ka thma."

"Phi iohi khynraw", la phai ktien u 'Len lum, "kam da dei eh ka thma, hynrei nga shu ai jingsneng ia u Hynñiewtrep u Hynñiewskum ba un ym shlan lano lano ruh ban ktah kti ia u paid u hajar jong nga, lynda kumta, ngan pynkyllon 'uwei hadien uwei pat." Hangta u 'Len lum u la iathuh kumno u la leit ban pynhiarkput ia u

Hynñiewtrep u Hynñiewskum, nador kata, u la hukum ia ki ba kin leit peit leit jngoh kumno ka la jia bad ba kin wan ban iathuh sha u. U la phah ia ki kumne, khnang ba ma ki kin long sakhi ia kata ka jingshisha bad ba ki kynhun bseñ kin burom-mane ia u kum u lahdul ha snieh pyrtnei.

U 'Seiñthli bad u 'Seiñstar ki la mih mador ban leit sha kata ka jaka ba u 'Len lum u la puh ia kata ka samla sotti bad da ka jinglyngngoh ka bakhraw ki la iohi ba ym shym don mano mano ruh ha uta u lum kumba la batai da u syiem jong ki. Kumta ki la par paswit sia-sia sha kliar uwei u lum bajrong ban jngoh. Iadien ba ki la pynshang ia la ki khmat shane shatai, ki la iohi ia ki paidbah byllien kiba ia rah da ka burom ba-ishongkun shynna iaci-re-iaci ha kawei ka krong na kawei ka trep. Kane ka jingiohi ka la pynshaiong-ngaiñ ia ki kumta ba ka jingkwah tip jong ki shaphang kane ka jingiohi ka la nangjur-nangjur, hynrei yn leh kumno, ban leit tur sha uta u paidbah byllien ruh ki tieng ioh shah pyniap pynban. Kumta ki la kut jingmut ba ha kata hi ka miet kin leit ban jngoh bad sngap siar ha kata ka iingtrep. Ka jingdum jong ka miet ka la wan ban kynoi thiah ia ki laiphew jingthaw bad kumta u 'Seiñthli bad u 'Seiñstar ki la ia par suki-jai ha kata ka miet sha kata ka iingtrep bad kyllaiñ ia lade mlun ha khrum iing. Nangne ki la iohi ia ki rangbah ba ki ia syaid ding ha phyllaw katba ki kynthai pat ki ia shong hapoh iing. Ki rangbah ki lapmiet la ka biria bad kypum duma pum shi pum katba ki samla kynthai ki iasang kwai ia ki kumba ju long ka dustur ka riti u Hynñiewtrep u Hynñiewskum ha ki iingiap. Shipor hadien ynda ki la ioh ka lad-ka kabu kaba biang, u 'Seiñthli u la par hajan maw kyrdon ban sngap aiu kita ki rangbah ki ia kren, u 'Seiñ-

star pat u la peit siar na khap syrdeng aïu ki leh hapoh kata ka trep. U 'Seiñstar u la iöhi ba ki kynthei ki ia rkhie ki ia biria kumba ki ia sngewbha eh bad u la tharai ba kato ka krong kaba u la iöhi dei ka jinglehrong-lehsngewbha halor ka jingjop u Hynñiewtrep u Hynñiewskum pyrshah ia u syiem jong ki. U 'Seiñthli pat u la iöhsngew ryngkhat ia kawei ka jingiäkren ki rangbah ha phyllaw ba ki ong ba naduh mynta ka sngi dei ban pyniäp pynduh-jait ia ki bseiñ baroh. Mar kumta hi u par-wut sha u 'Seiñstar u da khot kyrkieh ban iäphet iäp-phet-im noh na kata ka jaka. Ynda ki la ia poi sha u syiem jong ki ki la iäthuh ia u ki ong 'Pa iem kynrad, ki Hynñiewtrep-Hynñiewskum ki iäkmen ki iäsngewbha kato ka samla ba phi la puh ka khlem iäp pynban ki rah rong ia ka bad ki iashong dorbar ban pynduh jait noh ia ngi ki jait bseiñ baroh.

U 'Len lum u la pyrkhath shiphang bad ha ka jingsngewthuh jong u, u la pyrkhath ba u dei ban lum noh da ka dorbar ia ki bseiñ baroh ban ia pyrkhath-lang shaphang kane ka kam, kumta u la hukum ia u 'Seiñiöng u ha long u sangot ban kynih ban pyrta ban khot ban lum ia ka dorbar bah. Ha kata ka dorbar-dorsha la wan poi lut baroh ki jait-bseiñ. Shisien peit la i shisha kum ka them mawlynnai namar ka jingkhieh brip-brip jong ka met jong ki ha la i rong-i-rup bapher-bapher ba la nang pynih rong shuhshuh da ki kjat sngi ba shat lyngba ki sla 'nat diengbah kiba don saw dong kata ka lypung. Ynda tur hajan pat, wow ka jingiwkhong-iwli bad ka jingisaitmet ka bym lah shuh ban batai, shu par hi ka met briem-riem-riem ban iöhi ia ka jingbun jong ki ha la ki jong ki jong ki dur ki dar ba ikynsha. Kine ki ia kyllaiñ ia lade ha la i jong i jong i jaka ba ki ia jied ban shong ha kata ka dorbar, shu dap kata ka lypung smam.

Ynda la batai ia ka jingthmu kata ka dorbar, uwei hadien uwei pat na kita ki bseiñ ki pynieng la i khlieh ban pyni la ki jong ki jong ki nia, hynrei ym don wat tang kawei ruh ka nia ka ban iahap jingmut lang. Khatduh eh la pynieng khlieh uwei u 'seiñ tymmen shongprah shongshang uba la khiih kyüh kap-kap na ka jingtymmen palat. Ynda u la pynieng bha la ka khlieh u sei la u 'liej arpnat bad u padiah kumne.

"Para-pyrsa, ki kynrem-ki-lyndan, ki longkmie nongkdup nongsumar, ha phi ki paradoli-parasnam jong nga. nga hap ban ieng tymmen kdur ha phin iasngap-iasngew, ia kaba dei to iabat ia kaba lait to iakyndat. Kumba phi la iohsngew u Hynñiewtrep u Hynñiewskum u la smai u la spot ban pynduh ban pyndam ia ka jait ka kynja jong ngi. U syiem jong ngi u long u bakhlaiñ badonbor shisha ha la marwei shimet namar u don kata ka tiar iapom bakhlaiñ tam bad kata ka tiar dei ka BIIH kaba baroh ngi iatip lang bad ym don uno-uno u jingthaw uba lah ban ieng lada u syiem jong ngi u puh ne dait, katha mangi pat ngim don satia ia kata ka bih ban iada ialade wat la ngi don ki bniat ban puh ne dait lane u tdong ban sympat. Ka aiñ mariang ka iathuh iangi ba u syiem jong ngi um lah ban don ha ki jaka baroh kat shaba ngi don, kumta sngewsih ban ong ia kane ka jingshisha bakthang ba i 'Pa 'iem kynrad in ym lah ban iada iangi tang marwei hi ha kum kane ka por ka jingialeh. Nga tyrwa haphi namar kata, kumno phin sngew lada i 'Pa 'iem badonburom jong ngi in ai in sam ha ngi mar mar khyndiat ia kata ka bih." Jar la sngap ki paid bseiñ katba u dang sangeh shiphang ban twad ia ka jingmut jong ki, hynrei ym don manomano ba nud ban ong haoid, wat la hapoh hapoh ki kwah dik-dik ban ioh ia kata ka bih ban kham khilaiñ bor ban iada ialade. U 'seiñ tymmen u la ithuh ia ka jingmynjur

jong ki na ka jingiasngap jar jong ki. Ka jingmut ka jabiang ka paw kham kloi ha ka shyllangmat ban ia ha u thylliej. Kumta uta u 'seiñ tymmen u phai pat sa sha u syiem da ka jingpeit kum ban kyrpad rit hakmat ka burom jong u bad u ong 'Pa 'iem kynrad, phi long uba jynsur mynsiem, phi la pyrshang kat lah-kat iai ban iada iangi, hynrei mynta pat ha kum kane ka khep nga tip ba i 'Pa 'iem in ai in sam hi da lade ia kata ka bih namar i ieid eh iangi ki paid jong i. Da kaba i ai ha ngi ia kane ka lad ban iada ialade i 'Pa 'iem in ioh ka kyrkhu-kyrdoh na u Nongthaw-Nongai bad in iai sah barabor u syiem baieid eh jong ngi.

U 'Len lum u syiem bseiñ u la pynieng suki la ka khlieh nalor u mawlong ba u shong ha kata ka dorbar, u da kubur ha ka jingkren jong u ia ka jingai jingmut u 'seiñ tymmen. Ha u, u sngewthuh ba kane ka dei ka lad babha tam ban tep eit miaw ban pynklet ia ki bseiñ baroh ba dei na ka daw jong u hi ba u Hynñiewtrep u Hynñiewskum u smai-u spot ban pynduh pyndam ia ka jait ka kynja jong ki, kumta ha kata hi ka dorbar u prie bad sei ia ka bih baroh kaba u don bad u buh-bhah riang khyndiat-khyndiat u da sam ha man uwei-pa-uwei u bseiñ ia kata ka bhah. Don ki bseiñ kiba ioh ka bih kaba khlaiñ don ruh kiba ioh kaba kham duna jingkhlaiñ. Naduh kane ka por ki bseiñ ki sa don bih haduh kine ki sngi.

U Klinak dei uwei na kita ki bseiñ kiba ioh ia kata ka bih ka bakhlaiñ, une u dei u jait bseiñ u barit bad u kham don ha ki thaiñ ri War synteng, ka rukom par jong u ka pher na kiwei pat ki para bseiñ, u par khyndiat bad kli artat ialade kum ban shu tyllun i kumba un shu bsiat. Une u jait bseiñ um ju mih sha sla khyndew lait tang shisien shisnem bad lada jia ba u puh ia ki briew khlem pep kin iap ha shen. Ki ong haba pyniap ia une u bseiñ dei

ban breñ mar kumta hu ïa uta u dieng uba phi tangon lymda kumta ka bih ba kum ka ding kan par sha ki kti u nongpyniäp. Kaba ngi tip paidbah ka long ba ki 'riew tymmen ki maham iangi ban pyniäp bseiñ da u siej ioh par ka bih bseiñ hynrei da u dieng te ym ju kham ioh-sngew koit ba kin mana. Teng teng lah ban shem ïa ka met iäp une u bseiñ ha ki khap maw. Kane ka leit jia ba ka ñianglartham ne thapbawa khlaw kiba don ka bih ka bajur ki ioh dait ïa u ha ka por ba u mih sha sla khyn-dew. Ha ka jaka ba u iäp u 'seiñ Klinak wat u phlang u kynbat ruh u khuid plaiñ kumba katto katne pruh saw-dong ka jaka ba u iäp. Ka leit jia kumne na ka daw ba shwa ba un iäp u sei ka umbiah tyrtho ba la khleh lang bad ka bih ba u don.

Nalor u Klinak, ka bih kaba jur katta katta la ioh da u 'Seiñiöng uba teng teng ki ong u nang bha ban kynih syiar bad u mih shyrtong ruh ha ka khlieh kum u syiar.

U 'Seiñryntih ruh u ioh ïa ka bih kaba khlaiñ namar tang shu puh ma u lada ym lah ioh dawai kloi-kloi u briew ba shah puh un iäp ha shen. Une u long u bajrong-lytar bad ka khlieh jong u ka long kum u sop khnam. U long uwei na ki bseiñ ba stet tam ban par. Uwei u nong Iamkhon (Bhoi) u iäthuh ba une u bseiñ u bun ha ki thaiñ Bhoi. Nalor kitei ki bseiñ, u 'Seiñthli, 'Seiñstar, 'Seiñlyngkru, 'Seiñjyngam, 'Seiñ thyrnia bad kiwei kiwei ki don ka bih tangba kam da khlaiñ than.

Ka khana-parom ka iäthuh ïa ngi shaphang u 'Seiñ-um. Ki ong ba kata ka bih ba u ioh dei kaba khlaiñ tam ban ïa baroh ba wat kiwei pat ki para-bseiñ ki ïa peit atnud - peit bishni baroh baroh, hynrei ka la leit jia ryngkhat ba katba u dang kit ïa kata ka bih u la leit poi harud kawei ka wah bad na ka daw ka jingkhluät palat kata ka bih ba

la ban shop shuh shuh sa ka jingshit ka sngi u seiñ um u la sngewshit palat haduh katta katta ba u la sngewkwah eh dik-dik ban jngi-kai shwa ha kata ka wah Kumta u la buh ia kata ka bih halor u shyiap bad u la tap da ka eit masi khnang ba yn ym don ba iöhi bad tuh noh ia ka. Hadjen kata u la ryngkoh pum ha um u da jngi sngewbha ha ki khriang bad ki lat lat kata ka wah, u pynran-pvnxhih kynjai ia ka met ka phad, u kynjih kai bad sei la i khlieh sha sla um bloit-shi-bloit bad teng teng pat u suh khlieh shapoh. Ka dei ka sngi basngewtynnat bad syaid bha, ki dohkha-dohthli ki la ia mih lut na ki jarang ban jngi sngewbha. Ka jingsuk bahun-jai-jai ka la tap lup bad syr-pud-syrpai ia ka met-ka-phad u 'seiñ-um baroh shi-janmiet bad ha kata ka jingsuk-kynjai u peit byrngia ia ki kharit-kha, ksaiñ, ki dohthli ki shalynnai ba ki ia jngi sngewbha khwiap-khwiap harud ka thwei. U 'seiñ-um um shym poi pyrkhat ba ka jingsuk kaba kum kata ka ju wallam ia ka jingklusai hadien.

Ka la jia ba ha kata ka sngi kawei ka samla kaba khar eit masi ban sbor iing ka la dei iaid lyngha nang'a bad haba ka la iöhi ia kata ka eit masi ka la khar bad kit sha la iing khlem da tip ba ka la iöh khat lang ia kata ka bih. Ynda la kem iöngreiñ u 'seiñ-um u la mih na kata ka thwei bad u la leit beit sha kata ka jaka ba u la buh ia kata ka bih, hynrei da ka jingsngewsih-kthang u la shem ba la don ba tuh noh ia kata ka bih. Ha ka jingsngewthuh bseiñ jong u, u la tharai-beit ba la tuh ki para-bseiñ bad da ka jingbitar shla u smai u spot u ong "Naduh mynta ka sngi ngan pynhiarkput ia ki bseiñ baroh lada nga iöh lad ban puh shwa manga ia u Hynñiewtrep u Hynñiewskum ngan puh da ka bih ba ia pyrshah ia ka bih jong ki khnang ba lada ki iöh puh maki hadien ba nga la puh kan ym long-


kam-longbih shuh bad u hynñiewtrep u hynñiewskum had ki khun ki ksiew jong u kin ym shitom eiei. Mapha pat ka dohkha-dohpnat, ka dohthli-dohjei", u da peit mat dom sawtried ia ki, "pha kaba la pynbyrnia ianga haduh ba nga la shah tuh noh ia la ka bhah kaba nga kit shitom, ngan bam shngiam-rai da pha bad naduh mynta ngan shong ngan sah noh ha um ban ioh ka kput kyliang.

Dei naduh kata ka por ba mih ka jingong ba u 'Seiñ-um um don bih-don-sni bad ka bih ba puh da kino kino kiwei pat ki bseiñ kam mylla eiei ruh em lada la puh shwa da u 'Seiñ-um. Ka jingshisha ha kane ka parom u Barim ba ka dohkha-dohpnat, dohthli-dohjei bad ka shalynnai ki long ki jingbam-bakongsan tam jong u 'Seiñ-um ka long kaba ym don ba lah len, hynrei ka jingshisha la u 'Seiñ-um u don bih ne em, ka sah ha kane ka juk jong ngi kaba mynta ban wad bniah had sakhi da kaba ngi pyndonkam ia ka buit-stad jong ka juk mynta. (Science)

K H U B L E I I

REFERENCE

Not to be Lent out



S. 525

Printed at the
Don Bosco Technical School
Shillong.

Library books will give you Joy for Long
If handled carefully with clean hands.